

刀筆菁華錄

二



詳註新評  
現代實用  
刀筆精華錄

卷三 老吏批判

我有筆如刀室主編

珠聯璧合之妙判

陸稼書

當莊生舞勺之年。就傅於外館。翩翩年少。親串爭譽之。有鄰女周小娟者。雛鳳清聲。天真一片。兩人相見之下。愛好無猜。郎騎竹馬。女弄青梅。相悅日久。未免有情。塾師知其事。爲之作合。女父亦以爲然。後時過境。遷卒未納采。不數年。女父慕富家子。欲以其女別許。事聞於小娟。乃潛令乳媪告莊生。促其速謀。莊生情急。於是月上梢頭。人約黃昏。莊生遂由後閣而入繡闥。以商其事。絮語喁喁。蘭心脈脈。乃於此夜半無人之時。遂定其月圓花好之情焉。曾幾何時。生中解元。女字朱姓。生以言猶在耳。口約已成。卽強辭訟於官。適陸公稼書爲邑宰。廉得其情。於訟庭對簿之時。陸公顧

左右而言曰。解元探花。理革功名。姑念汝已有成約。而女亦甘心。使有情人。得成眷屬。因斷小娟爲莊生室。而邑宰爲其月老也。生與女乃大喜。感激稱謝不置。邑人聞之。無不歎才子佳人。珠聯璧合。豔羨於不已也。其判詞云。

竹馬青梅。早締兒時之密約。小跌宕徑。莫謂兩小之無猜。玉燕堂前。况乃親聆金諾。程門師氏。居然代作鳩媒。青雲得路。方期攀鳳而乘龍。金榜有名。便諧百年之好合。誰知大耳叵信。竟食言而無慚。以至昔誓未寒。棄宿姻而另訂。於是開月下之門。乳媪作青鸞之便。莊樓月淡。冷棲比翼之禽。繡帳春濃。暗鎖于飛之夢。蓮是並頭。而花開並蒂。樹乃連理。而枝亦連柯。雖乃父慕豪門。喜吉辰而將看碧鶻佳婿。乃閨兒愛才子。守密約而別抱如意郎君。在乃父之背盟。實有貳議之譏。愧對愛女。在莊生之相誘。事屬守一之義。不失人情。女白璧已玷。自難再歸他姓。生新科高掇。不慚快婿東床。解元登堂。愛婿由來棄婿。才郎入帳。新人卽是舊人。免致情天缺陷。遺憾永留。却教恨海填。

平精禽無用。有情眷屬。樂事如何。無限懽情。心頭可想。爲斷奇情一案。宜酬喜酒三杯。此判。

(評)佳人才子。連理交枝。事固奇豔。文亦綺華。以有情人而遇賢有司。雖曰三生有緣。亦屬千秋之幸。王道不外人情。誰謂陸清獻有道學氣哉。

弄假成真之妙判

陸稼書

姊妹行中。戲談相謔。原無足怪。有孫氏姊妹二人。夙相友愛。姊已嫁矣。固過來人也。於妹嫁之前宵。戲爲妹曰。妹夫之器。龐大而凶悍。交合之際。如何苦楚。嫁後宜慎之又慎。以免後悔。妹弱小無知。聞而信之。及嫁。常記姊言。惟恐其壻之早夕近己也。壻或笑顏偶對。女必驚惶失色。哀求涕泣。若大敵之將臨。無已。壻乃以離婚告於邑宰。稼書前。稼書詳訊之。悉其隱。乃爲判詞云。

妹夫之偉然兇器。風馬牛不關老姨。阿姊之永抱虛心。莫須有竟成巨故。趁片言之浪謔。誤一載之良緣。信口開河。原是無心說說。依訛纏誤。豈知永記。

牢牢提心弔膽。窺愚婦之枉抱虛驚。殊爲好笑。紐密帶嚴。嘆伊夫之同衾異枕。白負虛名。嬌花縱豔。可憐蜂蝶難探。甘雨雖好。其奈玉田不受。乃真缺憾。宜教媧女補天。是亦怨情。合使精禽填海。憂嗣絕宗。沈遂進稟單而心頭急。至水落石出。始識戲言。而前惑頓明。春暖紅幃。正好及時行樂。盟諧白首。何妨並蒂開花。理合重聯昔好。翩翩仍作夫妻。事如舊債須償。夜夜端宜好合。此判。

(評) 詼諧雜出。豔絕人寰。天下有此奇事。然後有此奇文。也是有此奇文。方可傳此奇事。

名士偷書之妙判

陸稼書

諸暨名士柳永春家貧無力鬻書。里中有某富翁藏書盈架。柳往偷之。被執送之官。稼書乃斷令富翁藏書悉歸永春。其判云。

蓋聞孫康映雪。志不懼寒。車胤囊螢。夜以繼日。匡衡鑿壁。偷光而未必傷廉。兒寬攜經。休鋤而不以爲懶。竹書有牛背之經聲。太守奇截蒲之古籍。斯亦

寒儒之可憐。而志士之堪獎也。已爾。乃蓬門蹇士。無力求經。泮水鰲頭。有心折桂。螢窗苦勉。竟無書簡之窺。鹿苑多藏。遂作胙篋之盜。必不得已。隳文人之高蹤。無可奈何。爲宵小之醜行。其事甚愚。厥心堪愍。夫以清俸買來。徒飽羽陵之碧蠹。兔園半冊。乃淪鴻烈於蓬蒿。誠可惜哉。每深恨也。今者散西堂之巨富。移陸民之美廚。藉陳王之祕帙。充董生之下帷。使燃薪者得濫觴于典籍。編柳者得抽緒乎文章。翦彼之有。補茲之無。與其束之高閣。爲無用之糟糠。莫若發自瓊環。而惠人以供賞。從此郝佐治之積蓄。又增經腹。蔡中郎之遺藉。不失傳人。兩有裨益。百無弊害。洵稱善焉。是可風矣。此判。

(評)於判詞中。可以見獎掖讀書種子之存心。

玉成連理之妙判

陸稼書

判得何王爭婚一案。有女懷春。遇吉士而始誘。其人如玉。洵君子之好逑。太王有好色之德。關雎詠相思之篇。何靜言以文壇健將。虎峙瓊林。兪鍼姑以賦名佳人。鳳翥謝闥。儷淑女於才郎。兪謂良耦。留太真之玉鏡。誰曰不宜。詎

料驚鳳夜半。吹連理以橫分。暴雨一朝落。並帶於污泥。吁其慘也。愈懷仁勢利爲懷。薰蕕莫辨。王舒義何嘗爲義。倚勢謀妻。東林坦腹。却嫌措大之窮夫。浪子登徒。反作眼中之快婿。有目無珠。珍磚舍玉。豈知後園明月。早開夜合之花。深闔珠幃。穩銷鴛鴦之夢。迨至玉人已杳。彩輶未迎。空奩存舊日之香塵。鏡渺孤鸞之影。徒喚奈何。孽由自造。逐臭夫枉爲人父。偪女乖儀。多情人不媿貞兒。矢志靡二。倚勢凌人。錫爾苦辛半載。欺貧奉富。反賠血本三千。何靜言花燭雙迎。仍是意中之表妹。碧衣進謁。還看昔日之老奴。是判。

## 立嗣相爭之妙判

陸稼書

膠城巨室楊氏。兩代孀姝。平居頗不相容。媳孫氏。擬立長房之子爲嗣。乃姑李氏。更欲立次房之子爲己子。因此相執。涉訟多年。案不決。後陸公爲之判云。

判得楊氏姑媳。爭立嗣子。各執一辭。雙方互訟。洵洵然積不相能。查楊李氏年已週甲。楊孫氏年正芳時。倘爲李氏立嗣。李固有嗣。而孫氏無夫者。爲孫

氏立嗣。則孫氏有子。而李氏更有孫矣。事出兩全。誰曰不宜。楊李氏何不思之甚耶。所請立嗣楊李氏。不准。此諭。

因騙得妻之妙判

陸稼書

判得趙生懷雕龍繡虎之奇才。不同庸俗。具方面濃眉之佳相。的是偉人。如蕭郎之獨宿。未結絲蘿。求淑女以雙棲。永諧伉儷。借攀鳳之名。行求凰之實。適遇嬌娃。欲償鴻愿。雖迹異。當爐噪豔。名于遐邇。喜身猶待字。傳有志於經書。槐花滿地。明中成一笑之緣。茶葉爲媒。暗裏遂三生之約。典絮袍而沽酒。幸遇瑯琊。返蘭棹而釀資。無忌梓里。詎雙團扇將引紅鸞。而八公山忽如黃鶴。阿翁無害冰清。快婿何慚玉潤。從此釵囊揀茗。不妨接前日之柔荑。想當環珮移蓮。孰料踐今宵之羅襪。天使人以作合。餅店客司。人奉天而施行。嘉定縣令。喜筵媒備。晉祝宜男。騙案官消。施恩赦賊。此判。

官吏狎妓之妙判

袁隨園

訊得李士果扭控典史孫子瀟狎妓一案。經本縣審問一過後。除關涉官箴

之處。應候通詳上憲。請示核辦外。查得該典史孫子瀟。文章固自放逸。丰姿又是瀟灑。年少多情。風流自賞。於整理令甲之餘。作流連翠被之舉。以爲靖節閑情。何瑕白璧。東山女妓。卽是蒼生。連牀無傷。小德儘可出入。訟獄清簡。委蛇未嘗誤公。余中請禁探花。卒以贓敗。傅元喜言兒女。乃以直聞。張翰有子史之詩。高風嶽峻。盧杞無侍兒之奉。醜迹風馳。臬卿忠臣。徵求花粉。輔國逆豎。靜學沙門。官聲之賢否。不在此外形之何若。况小妮子。亦猶人耳。倡茵溷之誤投。遂窮民而無告。文王視民如傷。不使內有怨女。外有曠夫。蓋同是朝廷之赤子。何可加以二視。遂以司寇之官。作護花之主。記臬臺之夢。帷幕來奔。築黨氏之臺。盟公割臂。神君憐去病。小吏念蘭芝。雖非居官之正軌。尙屬風流之小過。乃有李士果者。借公濟私。焚琴煮鶴。招搖徒黨。鋪張法令。捨簿領而調陰私。挾大府以爲恫嚇。不知蕭何律上。不禁笙歌。宓子堂前。豈無琴瑟。西平郡將。營妓自隨。白傅司馬。商婦度曲。雖踰規越矩。難律官箴。而好色怡情。無害金布。大府未及搜牢。長官未及狙伺。而先邀不相關係之所謂。

地方紳士。出而掩執。橫施豎牽。招搖過市。不論其居心何若。而侮辱長官。凶毆命吏。已足按律重懲。又律文非親屬。不許捉姦。所以維風化而杜刁頑。況女本東山人物。更無姦之足云。不過平時挾有私忿。借此以爲傾陷之具。本縣承審是案。一秉至公。既不敢袒屬吏。亦不敢干美譽。按法而行。無稍成見。除既詳請大吏。姑候令飭祇遵外。所有該典史。着交縣丞具保。釋放回衙。李士果毆辱官長。咎有應得。先行拘押聽候核辦。妓女金小鳳。發交官媒價買。房屋發封。此判。

名士偷香之妙判

袁隨園

照得被告宋雅秋。以相如宋玉之才。作奏曲窺垣之行。地非漢皋。何來解佩。遺鑄之女。舟非漁父。薰入桃源。月窟之途。在閨中突見不速之賓。芳心嚇碎。在書生以爲風流之事。前式尙存。於是船艙變作洞房。野合且隨雙宿。何料啟錠三更。已看愈行愈遠。遂以于飛一月。居然憐我憐卿。臥榻之旁。豈容鼯睡。釜底之魚。猶效鱉泳。既而圖窮七見。訝吟聲之忽來。事洩人隨。出明珠於

積底斯文受難。竟作階下之罪囚。縲紲爲災。有辱三楚之名士。貌羨東家。比嫦娥而有過。賦成好色。吐珠玉以無窮。以才子配佳人。天心有在。結舊歡爲新好。大令爲媒。此判。

## 誤娶石女之妙判

袁隨園

女不懷春。洞房惡遂好。速之願。物原虛設。桃源竟無問津之途。白雲空鎖。正惆悵乎老樵。月訊艱期。焉諦盟乎歃血。魚水之情。何堪言。螽斯之慶。安可卜。且門前荆樹。止有一枝。而凝想弄璋。夢懷尤苦。乃伐柯失則。事誤冰人。苗而不莠。猶如鏡裏之花。有乃若無。反爾人財兩失。無好合之望。有祀滅之憂。其情彌苦。事復可原。然而經人已娶。木旣成舟。無下堂之條。非七出之例。應着仍位正室。鄉人某旣戚隳宗。自可另置小星。再納房寵。俾資挽救之地。聊慰孝先之思。女父母以市儈手段。貿易心腸。不合欺心於前。又復肆兇於後。推其養女作貨物出門。概不退換。通彼媒人。冒充美品。贗以蒙真。本當按律究辦。姑從寬處。着將所有茶禮聘金。一律償還爾壻。以爲納寵之資。畧儆爾奸。

藉補前咎一體遵行毋違切切此判。

風吹婦女之妙判

袁隨園

袁公爲上元縣令。於五月十日忽大風。城中梁氏女名慧芬。年十九。已許字同邑秀才李調甘之子。是日被風吹至城外八十餘里之銅井村。翌日村人送歸。李疑有別情。訴請離異。袁洞悉其底蘊。以古時風吹女子事告李。并以元郝文忠公集示之。李讀詩大喜。叩首認過。袁命卽日成婚。判云。照得李調甘呈控韓宗梁女慧芬一案。本縣一再審問。見慧芬性情凝重。舉止端莊。絕無輕佻氣象。供被風吹落一節。亦極詳明。謂當是日大風起時。適在房中刺繡。因恐下雨。出外至後場收取曬衣。不料行至天庭。一陣狂風捲地而入。頓時仆倒。不省人事。迨至開眼。已在一陌生人家。環而視我者。約有五六十人。都不相識。彼此問訊。遂知此地爲銅井村。距家中已甚遠。因卽留宿其家。至次日將女送回。其家姓華。名不詳。家中約有男女五六人。亦不能詳細等語。本縣復移文江甯縣。傳提銅井村地處保正到案。據供五月十日

大風起時。確有一華姓者。名中元。在門外忽覩雲中一陣黑氣。由北飛來。至該處落下。初猶疑爲龍取水。後細檢視。乃一已死女子。是時衆鄰里亦已知曉。並來報告小保正。詫爲奇事。前往察看。於其胸部。尙有溫氣。因命人接氣。不一時女子始醒。問知爲城內韓姓家主。因留宿一宵。送之還家。餘情不知本縣一再研訊。供無異言。是韓女之至銅井。實由於風吹。是時爲銅井人救活後。以時遲路遠。不便送歸。留宿一宵。亦一常事。該秀才疑有曖昧。遽控官廳。請爲退婚。不唯冤屈好人。抑亦不明事理。况風能吹人。載之史籍。並無奇異之處。該秀才讀書五車。身入黌門。何竟當局者迷。一至於斯。現經本縣一再開導。證以衆口。攷以古籍。兩心冰釋。嫌疑頓消。仰卽備具花燭。卽日成禮。從此夫夫婦婦。齊眉百年。暮暮朝朝。兩心一意。阿翁不害冰清。快婿何慚玉潤。女非楊花之輕薄。無害風吹。士正護旛之金鈴。何嫌雨溼。今夜鴛鴦帳裏。笑吟新聲。他年和合衾中。麟來天上。全兩美之情。平雙方之恨。毋起違言。毋存前隙。花燭雙迎。仍是意中之佳婦。碧衣進謁。還看昔日之乘龍。此判。

(評)袁公此判。不僅玉成人之夫婦。抑亦保全人之名節。宰相須用讀書人。洵不誣也。至郝詩如何。今全錄之。八月十五雙星會。花月遙光照金翠。黑風當筵滅紅燭。一朵仙桃落天外。梁家之子是新郎。辛氏負從鍾季背。爭看足下來鬼物。雲鬢欹斜倒冠佩。須臾舉目視旁人。衣服不同言語異。自說吳門六十里。恍惚不知來此地。甘心肯作梁家婦。詔起高樓勝天賜。幾年夫婿作相公。滿眼兒孫盡朝貴。須知伉儷有因緣。富者莫求貧莫棄。爲花請命之妙牘

袁隨園

吳門名妓金三姐。貌甚豔麗。袁公會作桑庚之宿也。後三姐因事爲蘇州太守孔南虞所治。將用刑。袁聞之。乃馳書爲花請命。三姐卒得無事。

僕老矣。三生杜牧。萬念俱空。只花月因緣。猶有狂奴故態。今歲六十生辰。仿康對山故事。集女校書百名。唱百年歌。作雅會。買舟治下。欲爲尋春之舉。而吳宮花艸。半屬虛名。接席啣杯。了無當意。唯有金三姐者。含睇宜笑。故是嬌嬌於中庸。遂同探梅鄧尉而別。刻下接蕭娘一紙。道爲他事牽引。就鞠黃堂。

將有月缺花殘之恨。其一切顛末。自有令甲。憑公以惠文冠彈治之。非僕所敢預聞。但念小妮子蕉葉有心。雖知捲雨。而楊枝無力。只好從風。偶茵溷之。誤投。遂窮民而無告。管敬仲女閭三百。生此鷹階。似乎君家宣聖復生。亦當在少者懷之之列。而不必以杖叩其脛也。且此輩南迎北送。何路不通。何不近請於有力者之家。而必遠求數千里外之空山一叟。可見夫子之門牆。壁立萬仞。而非僕不足以替花請命耶。元微之詩曰。寄語東風好擡舉。夜來曾有鳳凰棲。敬爲明公誦之。

## 受誣得婦之妙判

袁隨園

懷春樓女。開錦幕而微窺。彼美狡童。停金針而長望。銀潢一水。隔女牛以難通。深意千重。賴眉目以相訴。春光半洩。何來暮夜之人。鴛枕雙棲。豈料冒名之客。暗中摸索。可憐美玉誤玷。意外奇逢。樂煞屠肆沽狗。然而事機雖密。忽洩微情。怪鼠聲之何驢。宵鳴屈戌。移愛女而別宿。血濺吳鉤。尋根究底。擔虛名而吃官司。無枉奇災。因鑽隙而遭不白。幸而妙計破奸。兇人自投案下。癡

心買女。惡賊猶想天鵝。應是法羅難脫。怨鬼附身。須知天視莫逃。孽因終報。受冤者終有明時。犯科者依律處斬。婉玉以思春而起巨禍。徧私情而墮清貞。自非白圭之玷。何云可磨。從此芳譽難言。將誰求偶。事原已肇。悔何及乎。吳某效吉士之誘。人隔天河而引盼。飛來巨禍。險乎首身兩分。素願未償。先喫苦辛數日。今愍其無辜。俾全昔志。雙成下嫁。托玉體以報誤。誣跨鳳人來。展錦衾而償渴疾。新人本來故好。夫妻原是冤家。女非天女。郎是織郎。各棄從前之怨。百歲長和。永諧白首之盟。三生有約。

才子佳人之妙判

袁隨園

幽幃深閨。難禁嫠女之情。園柳鄰花。獨滴孤棲之淚。近牆殘月。信稱絕妙之詞。閑蝶尋春。自是風流之侶。佳人慕才子。情或有之。寡女戀孤男。事已如此。探花郎探得名花。攀桂手攀來仙桂。得嬌妻作人螟蛉。兩無所憾。失兒媳反賺封誥。微幸何如。登堂認母。須知昔日之逃奴。和合兩家。永締百年之佳偶。

雅賊偷花之妙判

張船山

名園花木。本供賞玩之資。秀士行爲。豈可穿窬是效。阻游人之遨徠。方成漢客。畜出衆。踰竹籬而行竊。尹季繁罪戾難逃。姑念物各有主。爲惜花而閉門。事異偷香。因攀桂而越階。免予笞責。姑從寬宥。從此守分讀書。勿攀東家之豔。開門放閣。公彼一園之花。此判。

倒閉錢莊之妙判

張船山

稟悉。該莊既資本雄厚。信用昭著。營業發達。何以一旦遽爾倒閉。此中不盡不實之處。自不待言而可喻。乃該縣審核帳據。竟至一年有半。尙未審清。是更令人駭然。有司治獄。以案無留牘爲主一義。此不過一錢莊倒閉案耳。乃延至一年有半。尙未了結。則其他命案盜案之重於此者。將如何以辦。該令縱無隨同作弊行爲。亦難免辦事頽顛之譴矣。今據呈請。仰候下札該縣。迅行將該莊帳册一一宣布。並迅行着礙辦法。以平衆憤。而慰舉商。該商等亦靜候官廳秉公辦理。毋得先以不肖之心。逆僮官吏。以自取罪戾。凜之。此批。

(評) 訟事延擱。爲從前公家積弊。至今猶未免。張公可謂能體恤民間疾

苦自是名吏。

僧尼成奸之妙判

張船山

名山蕭寺。爲修供之場。禪榻蒲團。非風流之地。祛七情于智海。古井焉瀾。蕩六欲於慧門。塵心何染。該雲林賊禿。善應淫尼。地在東鄰。竟效相窺之宋玉。人非楚夢。何來爲雨之巫神。一步一步。地穴堪通。載來載來。月宮可入。諸如來爲月老。以大士爲嬪相。高燒佛燈佛炬。比花燭而尤輝。大起法鏡法螺。視絲絃而更妙。於是改比邱之禪榻。權作洞房。移貝葉之仙旛。聊充錦幔。不盡恩恩愛愛。而呼和尚哥哥。居然我我卿卿。緊抱尼姑妹妹。家雞野鷺。總號鴛鴦。夜合絲蘿。齊聲連理。紅綃帳裏。可憐對對光頭。和合枕邊。盡是尊尊菩薩。窮兇極惡。有汚佛門。穢褻荒唐。空云淨戒。彌陀見而閉笑口。觀音覩而捧顰心。不有金剛之法炬。會看慾火難平。若非寶筏以波羅。恐是迷津難出。西方道上。不少歡喜之禪。黃泉路中。長結雙鴛之侶。

主翁戀婢之妙判

張船山

有某翁六十無嗣。欲與婢秋菊通。秋菊矢志不從。爲翁凌虐。事聞於張令。懲戒之。判曰。

多情妙婢。原稱解語之花。此老春濃。猶是鬢礫之叟。強紅顏以對白髮。事不近情。繞枯藤以偪海棠。虐亦太酷。潔身高舉。空令弋人之思。毒手痛毆。如此狠心。堪恨。當令其薄板親嘗。權作摧花之榜樣。宜發以另配佳偶。聊償昔日之苦心。

撮合鴛鴦之妙判

張船山

判得才子配佳人。情有必至。傻夫配醜婦。理所當然。錢玉卿八斗奇才。乃儷陋女。戚秋仙容華絕代。恨墮癡兒。事原不平。耦固失當。於是後園締密約。認阿伯作情郎。香閨赴幽期。呼表妹爲外寵。鴛鴦枕開。上並蒂之花。和合衾中。棲雙飛之鳥。鴛鴦仙去。不吹秦女之簫。茅店征程。忽遇宵小之幕。捉將官裏。苦了酒店長卿。押解回來。却是西家宋玉。本刺史爲媒。出回天之臂。兩夫人作主。易鴛譜之名。改無鹽以配張郎。洞房中夜。又一對。與京兆以儷仙女。鳳

衾裏玉枝交輝。全兩美之情。平雙方之憾。各安本分。不得違言。自畫其眉。母隕厥職。是判。

無賴窺浴之妙判

張船山

楊二姐夏日在房中洗浴。被鄰人李大根。踰牆窺之。爲楊二姐扭控到署。船山遂判令李大根將二姐浴水喝乾以儆。亦趣事也。其判詞云。

訊得楊二姐葳蕤弱質。小姑猶是無郎。而李大根豺虎性成。色膽竟思獵豔。往日之垂涎已久。恨無嫌隙可尋。一朝之機會忽來。詎肯平空放過。禍緣楊二姐羅襦乍解。背人悄試蘭湯。繡帶旋鬆。隨手拋將藕覆。添兩頰之紅潮。徘徊顧影。縐一彎之青黛。宛轉淩波。而乃水聲之輕蘸。頓驚隔院登徒。遂謂香澤之堪親。遽效踰牆宋玉。寺非普救。無有張生地。異巫山。不逢神女。紅窗六扇。欲窺浴兮何難。白屋三間。卽偷香兮亦易。看含春之蓮萼。但有荷荷豔出水之珠胎。是真咄咄。奈此狡童。嚇破犀娘小膽。憐彼淑忍教鼠輩軒眉。扭赴訟庭。乞伸國法。含垢忍辱。似怨還嗔。本府疾惡如仇。愛民如子。若不從嚴懲

辦何以正風化而匡人心。自當照律科刑。聊以安良善而戒來者。惟是風流罪過。未爲入幕之賓。允當菩薩心腸。且放開籠之鳥。應判令李大根將楊二姐浴湯一飲而盡。識如蘭之氣。狂奴當亦無辭。充惜玉之心。巨盞無妨引滿。此判。

(評)趣事趣判。虧他想出。文亦典麗風流之至。

私設娼寮之妙判

張船山

審得李黃氏。招蜂惹蝶。居然仕女班頭。倒鳳顛鸞。宛爾氤氳使者。看入手之青蚨。便可開門延客。傾盈杯之紅友。時爲媚態向人。遂至枇杷花下。常來入幕之賓。萬里橋邊。不少問津之侶。是真淫窟。誤盡蒼生。嗟彼癡兒。揮空白鏹。陳阿玉袁琴仙張大姐等。或蓬門弱質。因貧入賣笑之場。或曠比匪人。一誤墮修羅之獄。母也天只。精皮膚時來巨棒之抽。人之無良。小鬼頭難禁春心之動。可憐火坑。安有青蓮。已入污泥。詎完白璧。然而花開薄命。害祇及於一身。草長含羞。毒將被於四境。蓋娼女錦衣玉食。豈知稼穡之艱難。而良家夕

織晨耕不及勾欄之逸樂。勢必爭相炫耀。廉恥將爲之蕩然。或竟羣起效尤。風紀更從此難問。而况塗脂抹粉。鬥顏色於今朝。足令喫醋撚酸。起風波於異日。防微杜漸。宜爲未雨之綢繆。酌理衡情。聊示下官之薄罰。李黃氏着杖一百。遞解回籍。不准再來。陳阿玉。袁琴仙。張大姐。一併發交官媒擇配。從此洗心革面。不妨婢學夫人。倘再賣俏迎奸。立卽從嚴究辦。房屋發封。龜奴開釋。噴鶯叱燕。酸秀才莫道無情。逐鷺留雞。醋娘子料應撫掌。

侵蝕公款之妙批

于人龍

稟悉。陶大年任卹嫠局之長。由全縣士紳公推。非本縣一人之意。視事以來。輿情有褒無貶。而陶又矢忠矢慎。每日必將捐款罰款數目。以至一切開支。無不造送四柱清冊。送縣彙核。並分送學官及捐款人民各處。以憑查核。從無有以隱匿來言者。且如此辦法。亦無從隱匿。該民本爲該局司事。此中情僞。豈不之知。乃妄操流言。遽爾投牒。是誠何心。豈以被陶辭退之故。不慊於心。而借此以爲報復耶。使果如此者。則爾誤矣。陶大年之操守。舉邑無間言。

萬無臨時改其常態。於明目張膽下。隱匿二百元。而且卽令捐款人自身改送至私宅之理。使爾爲捐款人。願乎不願。况捐款人又何以與管門者言及。而管門者又何以知其爲送至私宅。凡此種種。均屬不盡不實之處。一望而非真實。爾旣出首投控。獨不慮及此乎。本縣恐爾報復之心甫萌。而反坐之罪已成。至此爾真愈欲報而愈不能報矣。故曰。汝又誤矣。天下事不外一情理。理之所無者。惟或有之。若爾今所控者。實出於情理之外。須知陶大年之廉潔。全縣無兩。必不爲此侵蝕公款之事。卽使陶大年而爲一貪污昏庸之人。亦決無敢冒不韙。令捐款人自行代爲隱匿。代爲致送之理。雖三尺童子。有以知其不然。乃爾報復心切。遽爾掇拾此無根之談。以訟公庭。本縣不暇爲汝責。正爲汝憐。本應立予申斥。以儆妄言。繼念事關公款。且關陶大年令名。不能不一爲澈究。姑候傳提各方到案。並將卹發局每月稟報清冊。宣示各界。一以服汝之心。一以顯陶大年之操守。但爾旣膽敢具控。應先於傳案日。立下切結。俾訊結後。汝無所逃罪。否則一以灰賢者之心。一以長攻訐之

習。地方上尙有寧日。將見不肖者紛紛佈達。賢者避之若浼。其害胡可設想。本縣前曾到卹發局。亦一再與汝相晤。覺汝之爲人。尙無大謬。言語舉止。亦不似浮滑者之所爲。聞陶大年把汝辭退。心竊怪之。今而後始知陶之目光爲不虛。其識力勝本縣多多也。此批。

夫婦反目之妙判

于人龍

審得顧佛言與妻梁氏涉訟一案。本縣研鞫再三。開導數四。兩大不並立。妻妾操同室之戈。左右難爲袒。房闈成交鬩之地。歎子產之才難。笑尙書之所好。偶有軒輊。掩袖以啼。稍加慰勞。入門卽妬。以致舉案無相莊之雅。帳底風雲。抱衾啟實命之嗟。臥房荆棘。一則忘樛木之恩。祇圖自己快活。一則昧蝨斯之義。誰憐別個淒涼。雖婦女之恒態。亦中菁之醜言。本縣今爲爾斷。顧佛言應按七襄之典。輪侍床幃。平兩地之情。徧承雨露。勿生輕重。勿起愛憎。梁氏應懷江沱之悔。體樛木之情。我見猶憐。毋執南康之劍。兄來借宿。不斫車武之裙。蓮花應仰承主意。恭侍婦勞。毋恃寵以撒嬌。毋忘本而爭位。從此各

安一室。毋再交爭。庶耕前鋤後。和氣招祥。細骨輕軀。主恩永在。綠珠帳裏。笑吟子夜之新聲。卓氏房中。重鼓求凰之故曲。吾旣諄諄告誡。一片婆心。爾須諾諾以遵。百年好合。此判。

誘拐兒童之妙判

于人龍

本縣審得拐犯平德元者。三年來專在粵桂兩地。誘拐男女小孩。計有十餘次之多。男爲相公。女爲娼妓。如此忍心害理。實一死不足蔽其辜。又據供粵桂兩省。羽黨共有八十餘人。專事誘拐小孩。總處設在廣東嘉應州。餘地亦各有分處。所拐子孩。總計三年來。當在二百名以上。如此橫行不法。閭閻何以得安。卽以本縣論。前後三年。共接得小孩被拐稟牘。已有七起。其未經報告者。當亦有之。離人子女。破人骨肉。犯案纍纍。其罪實非尋常。按律誘拐門載拐賣小孩者。杖二百。流三千里。未成者減一等。杖一百。流一千里。本案平德元團合羽黨。橫行兩省。被拐者至有二百餘起之多。則其情節。實非尋常。拐案所可比擬。平德元雖非爲首。然其自身亦已犯案十餘次。亦不能從輕。

發落。着卽當庭杖斃。並通詳上憲。緝拿拐犯羽黨。以安善良。被拐小兒牛嘉寶。着由其父牛森具結領回。以完骨肉。此判。

嗣產互爭之妙批

于人龍

審得季少覃兄弟四人爭嗣一案。本縣研鞫數四。於情法上卒不能兩得其平。且亦絕少兩全之道。茲分別爲爾等言之。以法言。則少谷旣爲長房長子。自應以次房之長子承繼。則昭穆順而系統正。萬無舍次房而遠嗣五房之理。雖同爲同胞弟兄。無親疎遠近之別。然在昭穆上。則應以次房之子爲嗣。不能旁求他房。故依律。少禮主張以少覃之子嗣少谷。以少葵之子嗣少覃。以少文之子嗣少葵。均無異義。然以情言。少覃富而少谷貧。少谷以親生之子。嗣入一無所有之長房。而自己一生所經營之貲產。反付諸他人之子。易地而處。試問少禮甘心否乎。以理言。則爾等產嗣不爭產。然以世俗習慣言。則其子爲何人後者。卽得其所後者之財產。父債子還。父債子得。已爲天經地義之名言。使少覃之子入繼少谷。而仍得少覃之產。在少覃父子之親。當

然絕無異言。試問爲少覃後者。又甘心否乎。故爾等雖一再言爭嗣不爭產。本縣實未敢深信也。本縣現爲爾等計。欲法與情兩無所傷者。祇有折中辦法三途。其一嗣自嗣。產自產。少覃之子。不妨入繼少谷。而少覃之財產。仍不妨舉以與其子。然此層糾葛必多。目前縱不生爭執。不出十年。必又有事故發生。且與真情上窒礙尤多。此不能者也。其二准少葵之子兼祧兩房。產仍各歸其子。此層據少覃少葵言。均可遵從。然難保後一代不起爭執。且非公平之道。是又不便者也。其三依律承嗣。而將少覃少葵少文三人家產。俟五房一一承嗣完畢後。分作五份。統籌統配。則五子各得其所。雖少禮之子。未免太佔便宜。然以親親之義言。亦無所謂便宜與不便宜也。比較之下。似第三著最爲完善。本縣卽以此下判斷焉。且爾等兄弟五人。除少谷已死。後少覃少葵少文等三人。其家產相埒。且同營一業。每年拆帳分配。是雖分而仍未分也。少禮以教讀糊口。亦不致坐食廢事。不過少恒產贏金以貽其子耳。今試將每年店中盈餘。改三份爲五份。按五房分配。昔之每人得五百千者。

今改三百千。在少覃等三人。但望經營得志。盈餘增加。則此區區之二百千。亦何足齟齬以爭。致傷同氣之和。況此舉於自己親生之子。亦有益乎。少禮以不名一錢。而其子每年亦可獲利三百千。亦可云便宜之至。當不得再有後言矣。且爾等遵斷後。更有一事。可爲爾等賀者。卽此項辦法行後。此店在此十年二十年內。可不致分散。資本既厚。人力尤足。則其店務之發達。當必日進不已。否則爾兄弟三人中。一有差池。卽可拆開。今則以改作五房之故。勢非至四兄弟之子。一一承嗣後。是十年二十年內。此店祇有逐漸發達。決無中途衰頹之理。分則力衰。合則力強。爾等或久於經商。或熟讀詩書。當必不以爲非也。且爾等亦知兄弟睦。家之肥乎。少覃少葵少文三人。所以能富有者。非和好無間。同營一肆者之效乎。使不然者。人各一心。我行我素。則此時此店。已不復能如此之興旺矣。故爾等能各自讓步者。其所得必較諸今日公庭上所得爲衆也。抑爾等知兄弟如手足。財產爲外物乎。又知兄弟爲同氣連枝乎。爾等四人。今雖各自一身。休戚或不相共。然在爾等之父母觀

之。則同爲一塊肉而已。猶之爾等今日之視其子女也。今日爾等果爭執不已。則爲父母者。其傷心爲何如。爾等今亦爲人父矣。一念昔日。則不忍爭。蓋爭則傷天倫之親。壞手足之誼。並貽父母之痛。再一瞻後日。則不敢爭。蓋爭則恐兒孫效尤。以傷我之心也。本縣觀爾等兄弟四人。少覃少葵少文。旣能於三十年來。共營一肆。毫無間言。則平日之友愛。當不至十分涼薄。卽少文三十年來。亦能安分守己。自營生活。而於今日少谷之死。又哀痛逾恒。篤盡手足之誼。則其天性。想亦與少覃等不甚相遠。爾等旣友愛於前。此時年已半百。何不退一步想。爲身後計。爲子孫計。而必欲爭此區區。是本縣又深爲爾等惜也。現本縣爲爾等判。少谷之喪。應以次房少覃之子爲嗣。以下依次承繼。不得爭奪。至財產在現日五子未承嗣完畢前。仍照舊章辦理。各守爾業。不相侵奪。唯少禮或恐少覃等有作弊假倒等事。爲不利於己子之所爲。則可於每年拆帳時。監督其分配。並可檢閱其帳目。查核其出入。以視有無弊竇。除有意外事外。不得中途閑歇。或先私行分拆。但少禮亦僅有監察之

責不能分用分文。至五子承嗣畢後。再行分配。改作五份。如此則法與情均無所恨。爾等非盡不明事理者。當可細思也。本縣一片婆心。爲爾等設畫盡善。深望爾等念鵲鳩之義。懷同氣之誼。勿存芥蒂。勿生嫌隙。一心努力。共謀發達。庶兄友弟恭。子孝父慈。洩洩融融。極倫常之愛。三人同心。其利斷金。和氣致祥。訟則終凶。爾等其深念之。毋負本縣一番好意也。此判。

婚姻僭越之妙判

吳粵生

判得隸卒愚頑。婚姻僭越一案。該差等同廁隸胥。宜知法度。一則州轅執役。一則縣署當差。因畢向平之願。遂聯秦晉之姻。好事宜諧。盛儀安用。豈敢借兩人之花燭。侈陳夾道之旌麾。乃肆志鋪張。侈排儀仗。致胥臺之卑賤。效仕宦之威儀。招搖過市。罔恤路道譏評。闖過衙齋。任意公門出入。旣忘在公奉公。自用當罰必罰。科以不應之律。諒無解免之辭。笞杖加身。敲同蝶板。荷枷示衆。繫出蜂衙。只因狂逞一時。遂致法嘗三尺。遇紅鸞而逢白虎。問新郎於意云何。因牴牾而累犁牛。懲蠹胥當如是也。給以肉鼓吹兩部。餘音猶合。登

之笙簫賞以稱桌席雙台。雅敘作會親之筵宴。實葛藤以自縛。詎析楊之不清。公庭上戶對門當。豈云齊姝非偶。親家翁求榮反辱。正同楚子對囚。凡茲畧示薄懲。尙其速知悛改。此判。

### 太監離婚之妙判

大理院

此案王月貞提起離婚之訴。根據三種理由。曰太監也。重婚也。虐待不堪也。但使三者有一。已與法理不背。然據趨重家族主義之立法例。配偶者知有離婚原因。逾一年者。不得起訴。則前兩種之理由。已不成立。至其根據第三理由。則須有其他事實上之證明。不能憑空言提訴。但張靜波之辯訴狀。及口頭陳述。均稱甘心離婚。可見雙方愛情業已斷絕。主張請追還身價。並追王所攜逃動產等情。查人身不得爲所有權目的物。前清之季。已懸厲禁。況在民國。前此身價之欺。豈容有要償權。張又變其主張。謂我乃代彼還債。有字據爲憑。並非身價之比等語。夫王因張代還債務。故願爲其使女。是時王之對張。固明明負有債務。而以勞力爲辨濟。然張既娶王之後。則依中國習

慣。夫婦財產。並無區別。婚姻成立之時。債權債務之主體合併。權義卽已消滅。從前既無特定契約。事後豈能重新主張。至王隨身必須之衣服首飾。按諸法理。亦無褫剝一空。以償債權之辦法。張又謂非將贖身銀元。及拐攜之錢物追繳。實難從其離婚等語。殊不知離婚。乃關於公益之事項。還債。僅關於私益之事項。若因錢債之故。而遂拘束其離婚之自由。與法理未免逕庭。況張本蠶室餘身。祇應雌伏。而鵠橋密誓。竟作雄飛。陳寶得雌。固已一之爲甚。齊人處室。乃欲二者得兼。而如王者籍隸章臺。身非閨媛。桃花輕薄。本逐水而無常。柳絮顛狂。豈沾泥而遽定。在王既下堂求去。不甘鴛譜之虛聯。在張自覆水難收。無望鸞膠之再續。倘必作兼葭倚玉之想。求破鏡之重圓。恐復有蒺藜據石之占。難入宮而不見。所以聚頭萍絮。何妨池水分流。並命蕙蓮。儘許花風吹散。至若玉臺下聘。雖有千金。而金屋藏嬌。俟將二載。一雙條脫。既經璧合於羊權。十萬聘錢。詎望珠還於牛女。時則王固可請從此逝。而張亦無容過事要求者也。雖然事非所天。黃鵠不妨高舉。而物各有主。青蚨

何可亂飛。同衾人縱許裾分。阿堵物豈容席捲。蓋一則監守自盜。未能舉證。剖明。一則人財兩空。亦應原情衿恤。用定期限。勒令償邊。因據以上理由。判決如主文。

### 假裝尼僧之妙判

朱之榛

關西有王某。無賴子也。豔某庵尼。遂喬扮女僧入污之。尼不屈死。王某仍留於庵。大家婦女爲所污者。不計其數。後事破。戮于市。臬司朱公判之云。審得王某。係關西亡命。優僕奸徒。持邪術以惑黔首。塗紅粉以溷朱顏。狡托沙門。本是登徒和尚。嬌藏金屋。改爲入幕觀音。抽玉笋合掌祥林。孰信爲尼。爲尙。脫金蓮展身繡榻。誰知是女。是男。譬之鶴入鳳巢。始弄關雎之好。蛇游龍窟。豈無雲雨之情。法雨慈雲。錫杖挖開覺路。貪泉慾火。楊枝灑徧人間。明月本無心。照霜閨而寡居不寡。清風原有意。入朱戶而孤女不孤。謬說老僧入定。效漁郎而竟入桃源。更非架箭藏機。騎赤兔而橫攻細柳。一絲不掛。二妙俱融。沾穢清貞。有污法界。廢其居。焚其書。方足以滅其跡。剖其心。劊其首。

不足以盡其辜。

(評) 惟良吏爲能除民害。此老雖稱朱瞎子。而洞察實情。無微不至。

鋤斃姦婦之妙批

朱之榛

本司近來久不讀律。然律意則心知之矣。此案秦田旺供稱實係戀姦情熱。商謀同死。姦婦姦夫並臥於鋤刀之下。女靠裏而男靠外。姦夫引手攀刀向下。刀爲女隔。刃不及男頸。故女死而男猶生。當經房主聞聲趨視。拖拽出鋤。若稍緩須臾。姦夫既決意同亡。必不負心獨活矣。來詳謂此案若覆審無異。應照謀殺人從而加功律擬絞。殊屬紕繆。兩人同謀謀殺己也。非殺人也。乃自盡也。無所謂加功也。凡彼人殺人。而此人從旁助之。則爲加功。試問此案。有另殺姦婦之人耶。此詳若該牧自作。則書生可原。若刑幕所爲。則勒令卽日辭館爲妙。仍候督撫憲暨臬司潼商道批示。繳格結存。

志爲好官之妙批

胡林翼

閱稟尙有思路可入。官先事。士先志。志在爲好官。必無不好之理。嘗笑近年

官吏若以小學生作八股之勤苦。施于政事。事無不辦。若以歲得束脩之數。爲自奉于官場。則雖瘠苦。亦沛然有餘。朝廷之設官。其祿養固較束脩爲優矣。該令亦思及近數十年。凡蠹病國民之吏。其子孫有至今昌熾者乎。幸勿墮落迷途。力矯積弊。至囑至囑。

抹殺綱常之妙判

胡林翼

李維四有奴名桂林。與主婦有染。李家族人聞而大憤。向府告發。縣令引和姦律判杖。胡公意不爲然。乃重判云。

桂林之姦在業。經自立門戶以後。該縣遂引和姦律判杖。審如是。則凡贖身之奴。皆可酣眠於主母之榻矣。抹殺綱常。成何讞法。仰嚴審。另擬報。

秀才獵豔之妙判

胡林翼

查錢錦既讀青衿之詩。當知少時之戒。別嫌明微。當守而不失。乃出入於潘某之家。任肆佻。即使來稟所稱索負是真。亦無擅入房帷之理。而況中證既盡死亡。筆蹟又復模糊。茫無可據之談。安能執之以爲風流解嘲耶。嗚呼。

使君既已有婦。羅敷夫豈復無夫。入圃盜瓜。豈止嫌同納履。無風落帽。誰云變起摘纓。好淫無恥。國法應伸。奪其故物。無致汚我士林。杖彼皙臀。庶幾祛此孽障。

指腹爲婚之妙判

胡林翼

有農家女李娟娟者。早失怙恃。由兄嫂撫養之。及長。風姿美秀。年將破瓜。忽有劉文海前往。揚言娟娟之父。曾與汪思敬之子珊寶。指腹論婚。強委聘金。劫之而去。兩相涉訟。胡公判之云。

奇葩未豔。蝶使不知。異卉將開。蜂媒遽至。此中消息。安得不令人啓疑耶。查閱雙方辯狀。情詞各執。但據汪珊寶稱。果使伊父思敬。曾與李娟娟之父蓮舫。有指腹爲婚情事。胡爲十六年中。從不遣一介之使。以通情好。直待娟娟及笄年華。桃夭將賦。方有蹇修。敘述原委。微論指腹爲婚。法律所不許。卽此恃強力劫。人情亦所不容。况雙方主持之人。均已物故。又豈可以起二老於九原之下。以訊其虛實。此種飾詞。安能聳聽。本應離異。以儆刁頑。惟念婚已

逾時返非完璧。且詢之娟娟。又復俯首無言。懸揣其意。或願從一而終。幸其未字。何必活拆鴛鴦。而使男女咸懷怨恨哉。至刼婚惡習。有干法紀。應加重責。以爲懲一儆百計。劉文海教孫左袒。並杖不赦。

### 救災防疫之妙批

胡林翼

興國縣霪雨成災。署令據實稟告。以便上奏。

據稟。闔屬霪雨爲災。連綿月餘。濕氣薰蒸。疫病大作。有父子同時殞命者。有夫婦相繼亡身者。更有蔓延全村。致醫生無從施救者。甚至囹圄罪犯。亦多猝然而斃者。一再批閱。爲之惻然。今歲天時不正。蛟水大發。省會中霪雨經月。春花蕩然。本部院前經率屬虔禱。始睹皎日。該府亦當率領全城官紳。設壇虔禱。并禁屠宰。以迓天和。而消癘氣。至疫病之作。外由於六氣之所感。內由於七情之所傷。飲食起居。均須在在注意。固不能諉諸天意。而亦當稍盡人工。但已死者。縱難拯救。而未死者。要當賑恤。按入告之章。言災異者。言祥瑞者。止於地震旱澇等類。而不及瘟疫。然查會典開載。凡遇災異。宜具實奏。

聞。又開災異卽奏。無論大小。凡水旱災荒。皆以有關民瘼而入告也。此次瘟疫情形。並作何賑恤之處。著卽備陳所知。以便轉爲上奏。

蝗災害民之妙批

胡林翼

南漳縣有蝗災。縣令稟報。

烏雀食蝗。又蝗自投河。均欺謾之詞。該令才識。亦可想見矣。其實心愛民。實力督捕。毋一時刻。不以民生國計爲念。或者天憐其誠。尙可免罪。今日之吏治。無一事不思奪民。衙門丁胥差役。無一人不思朘民。是害民者。不止蝗也。凜之念之。

嚴懲兵弁之妙批

曾國藩

據稟已悉。金山衛城前准李撫部院來咨。業已先復矣。浦東一帶肅清。該營尙爲出力。殊堪嘉獎。唯昨准李撫部院緘稱。銘字營勇夫。槍斃奉賢縣楊令一案。不勝駭異。該都司雖遠在金山。何以一任營哨如此肆鬧。本部堂募練淮勇。具有苦心。兩淮風氣剛勁。古來多出英傑。近日無人倡導。其甘心爲髮

逆爲擒匪者。則竭力苦戰。抵死不悔。卽幸而爲弁勇爲團練者。亦久染惡習。騷擾百姓。本部堂與李撫部院之志。欲力挽淮上之惡習。變作國家之干城。第一教之忠君。忠君必先敬畏官長。義也。第二教之愛民。愛民必先保護閭閻。仁也。斯二者。總須紀律嚴明。訓導有素。李撫部院倡之。全賴爾銘鼎春樹。各營官教之戒之。淮勇將來爲忠臣。義士。爲名將達官。是爾等數員教戒之功。若爲驕兵悍卒。爲害家凶國。亦爾等數員不教之罪。成敗禍福。係乎爾等。營官數人之身。亦卽在此立軍數月之內。此時不變昔年之惡習。則終不能變矣。所有奉賢一案。仰霆字營劉游擊查出行凶弁勇。緝送李撫部院大營。盡法處治。不可袒護。一二滋事之勇目。敗壞淮勇全軍之聲名也。仰將滋事緣由。及懲辦情形。稟覆查核。此批。

（評）曾公治軍。教以誠信仁愛。不僅以陣勢技擊授人也。此批寬猛相濟。誠意感人。亦可以見其紀律之嚴明。治軍之有法矣。

訓勉勤奮之妙批

曾國藩

辦事者莫恃上司之恩典。宜仗自己之本領。若有本領。辦事好。雖仇人做上司。也不能壓下去。若無本領。辦事不好。雖父親做上司。也不能抬起來。爾年紀尙輕。若立定志向。何事不可爲。目下第一須認真修牆控濠。修成之後。與本部堂老營牆子相同。雖有數萬賊來圍。也不怕他。則脚跟立定。人人皆另眼相看矣。若全無本領。縱然做到提鎮。也是抱愧的。望爾日日學一勤字。勤到十分。自然做成一個好漢。本部堂現已年老。尙從勤苦二字用功。故亦以勤字教訓爾等。勉之。此批。

私藏軍械之妙判

李鴻章

兵丁鄒得勝。林文標。張錦榮。許叔寶。許文奎。趙錦標。季黑虎等。信步所至。迷其路途。時則夕陽斜照。倦鳥歸巢。鄒得勝等徘徊道左。欲覓旅店棲身。而異地人疎。苦無從得其入門之處。正在籌商進止之際。忽有鄭功根。張小山其人。窺其動靜。悉其緣由。乘機進言。願爲嚮導。乃領入陳姓旅館中。暫爲棲止。孰知大雨滂沱。連朝不止。鄒得勝狂飲濫賭。直至放晴。而囊中青蚨已無復

存留矣。酒飯之費。勢無所償。不得已。乃將兵器暫留爲質。約期歸取。彼陳姓旅館主人。祇知玉佩暫留。傳作酒家勝事。詎料銀瓶指索。竟爲馬上粗豪。鄒得勝等返稟防官。捏詞妄告。以致差兵拘擾。而地保王小六。尤復助紂爲虐。以私藏軍器之名。加諸陳姓。嗟嗟。營兵旣張虎翼。地保復逞狐威。陳固懦弱。者何以堪。此。况擾擾之中。雞犬爲之不寧。什物多被搗毀。旅客中更多亡失。衣履之物。是何景象。法紀安存。鄒得勝等旣各持兵器而歸。王小六亦索賞而返。陳姓主人痛定思痛。不能加其罪於鄒得勝王小六等者。乃歸其咎於疇昔之夜。引鄒等留宿之張小山鄭巧根兩人。列舉情節。稟控前來。歷經審訊。案已明白。彼張小山鄭巧根兩人。雖爲先容。執料後果。若判以罪。未得謂平。鄒得勝等犯法亂紀。仰該營長官以軍法從事。地保張小六。立即斥革。不准化名再充。欵內諸贓。并着令賠償。

## 僞印收租之妙判

李鴻章

奸民程筱山。僞造官印。盜收租籽。後其子介石。抱僞印自首。

奸民程筱山。僞造官印。其當死之罪一。盜收租籽。其當死之罪二。案經屢審。證供確鑿。僅予一辟。猶未足以蔽其罪辜。第本部院於此。重有慨焉。蓋筱山犯案。不出於仇讎之告發。不出於官府之檢舉。而首先抱印質證於公堂。不稍隱諱者。乃爲其子介石。昔父爲子隱。子爲父隱。直在其中。聖教所嘉。尙若其父羊平。而子證之。妄爲親者諱。爲尊者諱之義。而詡詡然以訐爲直。在法或有辭可借。而言情實無地自容者也。程介石以弱冠之年。人情世故。當亦有所聞知。乃以親生之子。證阿父大辟之罪。此乃世道人心之大變。雖屬該犯平日之教化無方。模範不正。有以開其不孝之心。而值此聖朝之世。竟有此千古異聞。發見。則司教育之責任。要亦未容卸盡矣。請按大清律載。有親族相爲容隱之條。凡同居及大功以上親族。除謀反叛逆外。其餘罪犯。許其相爲容隱。并勿論罪。夫大功以上。尙許容隱。况親生子乎。又按大清律云。于法得相容隱之人。爲之出首。比同罪人自首免罪。其小功緦麻親出首者。亦得減等。此固仁之至。義之盡之法也。然謂以子證父。比之罪人自首。情形又

有不同。免罪之條。蓋亦未能援引者也。况再按大清律云。自首有不盡者。仍以不盡之罪罪之。令程介石止首。彼山私造假印之罪。未首。彼山盜收租籽之罪。則彼山侵盜錢糧之罪。固自在焉。嗟嗟。僞印收租。罪實浮於斬首。以子證父。事更反乎倫常。應照所擬。分別處刑。

賴婚妄訴之妙判

李鴻章

秦季兒女。原無婚約。祇因時值兵災。秦母提女避難於鄉間。季姓因此豸娟。曾言盍配於幼子駿奎爲妻。此原屬於婦人無稽之閒敘。不能作爲正當之定親。况事過境遷。秦亦返家。女大須嫁。理所當然。適有作伐者。秦母允也。剛締朱陳之好。忽來責難之言。季姓竟據片面之詞。訴秦賴婚。須知無聘無媒。案難成立。羅敷已屬他人。使君正可擇偶。對簿公堂。徒傷情感。倘再嘵瀆。杖責不寬。

重利盤剝之妙判

李鴻章

借債放債。原屬人民通融之辦法。蓋無論何人。不能時常有贏而無絀。偶或

手頭拮据不得已而向人籌借。揆諸朋友有通財之誼。則苟可周急。自屬美事。卽酌取子金。亦無傷於廉。乃有貪詐之徒。借放債之名。爲盤剝之實。加一加二。漫無限制。利上盤利。逞心計算。年終總結。數倍有餘。子大於母。指浮於臂。有若陳桐根之放債於蔣惠夫者。以十兩之母金。不半年而竟至三十餘兩。魚肉小民。寧止惡浮於虎狼。亦且行同於賊盜。忍心害理。殊屬駭人聽聞。刻薄成家。理無久享。陳桐根曾入鬻留舍。奈何未思。姑念尙未取利。情有可原。蔣惠夫着將母金十兩。分期籌還。所有子金。概不准算。庶幾與者受者。兩得其平。

乘隙竊玉之妙判

李鴻章

戴子安有婦吳氏。容貌妍華。風儀靜雅。鄰居有許愚生。夙有垂涎之意。苦無染指之機。及戴外出。乃乘隙借訪戴之名。思從此鑿吞吳之慾。

獸衿許愚生。貌堪擲果。喜爲蜂蝶之狂。戶外尋花。輒施佻健之行。穢聲久彰於鄰里。大名直玷夫子衿。窺吳氏獨居。色心頓起。乘戴某他出。惡意相看。借

名訪戴。實爲吞吳。與乃夫無半面緣。居然稱弟。見阿嫂。竟稽首拜。儼同至親。寒暄並無一字。恩愛直欲千般。方見色而魂飛。有詞未吐。詎聞聲而胆落。無洞可鑽。外來之眞夫。詢其胡爲而到。留居之內婦。辨白竟自無從。若非鄰里證其乍來。幾致官府亦疑有染矣。嗟嗟。見色卽慕。淫士之常。無因而至。惟爾所獨。證旣確鑿。杖不冤枉。至行學飭戒。又屬分內應得之事矣。

(評) 運筆瀏亮。折獄老當。

褒揚貞魂之妙判

曾國荃

黃烈女淑華。上元人也。幼穎慧。當江甯城破時。湘人申某入其室。殺兩兄。而欲犯淑華。挾之出。不從。申并殺其母與弟。強之行。淑華痛哭乞死。繼念大仇未報。不如密紉哀服。僞從之。及至亂平。軍中多率婦女以歸者。淑華亦隨申至湘中。申所挾婦女凡十餘輩。皆已價賣。而獨留淑華。淑華懼。及抵湘潭。密以醖和酒入夜。申飲而醉。倒臥榻上。淑華曰。吾今乃可見父母於地下矣。遂從容自經死。後申遇救未死。檢淑華衣中。得詩數首。備極沉

痛。地方有司。因上其事於忠。襄奏請褒贈。其詩曰。十年小謫住塵樊。辜負  
衰親。罔極恩。白骨拋殘荒艸編。挑燈獨自暗銷魂。劇憐俘纍別柴門。日坐  
針氈。死未能。卻喜狂郎爲貨縛。天教白壁玷無蠅。無何月。又見初弦。迫我  
同登江上船。舟子掛帆無急祝。可知儂不願生全。帆征又說抵長沙。遙望  
湘靈廟。拜嘉已翦赤繩。教寸斷。莫令哀怨訴胡笳。自古成仁總殺身。吾生  
何必苦逡巡。懣將浩氣還天地。長共貞靈在九垓。

上元黃烈女淑華。具桃李之姿。凜冰霜之操。身雖陷于紅巾。行不玷夫白璧。  
端嚴固由于庭訓。貞烈實出自性生。輾轉避丘。未喪綱維於塵世。從容練幅。  
克全節義於泉台。弱質而負剛腸。豈尋常巾幗。神存不因身殞。慚吾輩鬚眉。  
揆諸公意。既已僉同。褒彼貞魂。曷容更緩。自當奏樹閭里之風聲。藉以闡宏  
幽潛之德化。

(評)其心苦。其志堅。忠襄此批。亦可慰幽魂於萬一也。可不表而出之者。

旌節闡幽之妙判

曾國荃

盱眙牛志五妻文氏。家本寒。以耕讀爲業。遭紅髮之難。夫先卒。氏方二十。毀容事姑。有餘資。輒周濟貧乏。年四十九卒。邑人因請曾公奏褒焉。

節孝爲婦行之備。而遭家不造。艱難險阻。卒能孤行其志者。尤爲人情所難。至於身處窮約。而以勤力所贏者。好行其德。則益非深明大義。不能及此。是以我朝於節烈婦女。一經臣工據實奏請。無不恩予旌表。誠以培成世教。扶持人倫。其道在是也。該氏勵操青年。迄於皓首。節孝咸備。兼撫遺孤。而濟物推財。志行尤爲可佩。旣爲巾幗之完人。宜沐褒揚之盛典。藉維風化。而闡幽潛。

欲速不達之妙判

端午橋

天下事求之過急。則成功愈緩。操之過切。則貽害愈多。爾因中年喪偶。膝下無兒。急欲續絃。以主中饋。人情之常。豪無足怪。獨怪爾不娶門戶相當之閨女。而納一不清不白之寡婦。其爲吝惜金錢耶。而化費聘金三百五十串。娶閨女亦綽乎有裕矣。總之。由爾要老婆之心太急。正式續娶。猶恐耽延時日。

媒討寡婦。可以立地過門。故人言聘金若干。爾即願給若干。不料急色兒之極態。已被人窺破。遂有鄭永志以渺不相關之人。橫加干涉。藉辭訛詐錢四十串。詎知一波纔平。一波又起。該寡婦之胞兄。又出頭攔阻。使爾愈飢而愈不得食。愈渴而愈不得飲。覽稟殊堪噴飯。此等混帳官司。無怪李令之不理。本部堂亦無有閒功夫。管爾此等糊塗家事。特斥不准。此批。

妾媵爭寵之妙判

端午橋

判得側室扶正。律有專條。寡婦再醮。例所不禁。各具充分理由。宜乎供詞各執。兩雌不並立。本屬恒情。後進而爭先。奚能忍受。戰雲激起。訟釁難平。妒津之惡波翻騰。中葺之醜言悉露。增羞閨闈。貽笑大方。本部堂用抱息事甯人之意。爲籌排難解紛之謀。着即分居兩室。毋啟爭端。共戴一天。不分偏正。今夜文君當夕。好暢聆相如之琴。來宵朝雲侍巾。莫笑譏東坡之肚。倘敢故違。定干重懲。是判。

勢利賴婚之妙判

端午橋

判得方杏坡多文爲富。而窮於財。高協慶勢利爲懷。而昧於義。始以申表聯姻。繼嫌貧窮離異。出爾反爾。守財虜公道何存。不卽不離。憐才女貞心獨抱。本來淑女配吉士。間稱嘉耦。何知中道變初心。頓翻前議。有邢小山者。燻天銅臭。滿腹芳團。倚勢謀妻。央媒下聘。登徒子竟成快婿。紈袴兒儼作東牀。乃小山迨其吉矣。來朝擬行奠雁。而淑姑請從此逝。深宵竟效飛鴻。玉人已杳。彩輿急來。忽煞老夫。奈何徒喚。稟諸邑宰。勒限找尋。窮書生無端被累。對簿公庭。多情女矢志靡他。守貞佛殿。幸而巧遇親姑。今已來轅自首。本部堂恤爾一對可憐蟲。准予合成同命鳥。高協慶欺貧重富。罰銀三千。作淑姑賠奩。邢小山好色貪花。當伴醜妻。聘貞姑爲婦。花燭雙迎。方杏坡完聚意中之表。妹青廬接去。邢小山仍娶高氏之閨媛。是判。

## 節婦請旌之妙判

樊樊山

據該同鄉官公稟。爲周故令維祺之妾周蕭氏。請旌一案。該故令早開八歸。歲見數喪。妻亡而子繼殂。子故而孫弗嗣。其儻然僅存者。二孀媳。二女孫而

已。念不孝莫如無後。遂生枯楊之梯。而雖老猶尙多情。爰有采蕭之詠。來當臘日。命宮帶青女之霜。容易秋風。病榻臥茂陵之雨。猶日斟量藥餌。扶護暄寒。論年華則老穉懸殊。論恩情則周星未滿。周令彌留之頃。預商放遣之謀。而姬儂焉弗答也。迨至所天見背。頓地長號。手辦灰釘。躬親含殮。蓋棺事畢。仰藥自裁。時光緒三十年七月二十四日。距周令之歿纔五日也。嗚呼。橋填烏鵲。正銀州拜織女之期。地近馬嵬。是天寶葬楊妃之處。方謂遺言在耳。效晚嫁之楊枝。豈期大節凜然。出小家之碧玉。可知天地剛健中正之氣。不擇人而後鍾。益嘆古今愛錢惜死之官。曾賤妾之不若。憫茲義烈。宜予褒揚。仰俟轉詳請旌。繳結存。

身世可憐之妙判

樊樊山

來稟情文縉斐。自述身世。爲之惻然。君以名孝廉爲老廣文。歷擁皋比。中遭擯棄。寒毡不暖。苜蓿長饑。啄木啄距長。鳳凰毛羽短。傷心人不獨一薛令已也。鄙人心勞政拙。名過實而德不堪。厦廣裘長。言則夸而力艱。逮邦有宿學。

誼當推援。遇合有時。君其知之。

三寡爭產之妙判

樊樊山

富室柳氏。兩代三寡。以爭產興訟。幸有柳親族鄭彥傑調解。稟縣息爭。樊深爲嘉尙。批云。

據稟已悉。該紳等調處柳故紳家事。公平周妥。深屬可嘉。查該故紳在日。仲宣體弱。伯道嗣艱。此次與妻柳周氏入川。病中擇立齊遙兒爲嗣。旋即病故。臨終與周氏託孤。周氏亦立誓守節。扶棺攜子。千里遄歸。家有庶祖母二人。曰柳銀氏。曰柳王氏。多年孀守。今柳紳逝世。一門三寡。縞素同居。嗣子伶仃。年方兩歲。似此傷心慘目。宜何如性命相依。乃銀王兩氏。平時本不同心。周氏新來。年才十九。家庭不睦。亦是常情。柳姓又號素封。親戚中憐孤恤寡者固多。而唆事圖財者。亦所時有。遂致柳王氏欲謀別繼。而柳紳岳母周李氏。代女鳴冤。本縣熟察案情。諭令該紳等妥爲折筭。齊遙兒係柳紳受繼之子。祇不許旁人插繼。茲據調處。稟復前來。所有家產。按三股均分。號事不許私

自變更地畝不許售賣。此時三代孀婦剖一爲三。將來銀王兩氏物故。依然三分歸一。悉照本縣前諭。一一遵行。在該紳等固善作調人。而柳氏三孀。一經勸導。遂各消除意見。從善如流。均屬才節兼優。深明大義。准將此稟永遠存案。以後如有不良之人。播弄是非。離人骨肉。以致三孀生衅。繼嗣不安者。准原管之人及柳氏家族號影。指名稟究。本縣必盡法嚴懲。該紳等往復馳驅。賢勞極矣。積善餘慶。敬爲諸君子頌焉。

調戲寡婦之妙判

樊樊山

據稱爾孀居姪女呂王氏。在院中洗足。突遇王書娃上前調戲。將銀鐲繡鞋拿去等語。查院內非洗脚之地。繡鞋豈寡婦所穿。青天白日。門戶不關。脫下繡鞋。退下銀鐲。竟在後院洗濯足垢。誨淫誨盜。誰實啟之。此等案情。虧爾不愧不怍。竟向代書縷述。試問爾姪女到堂能逃訓責乎。惟王書娃淫惡棍徒。既據呈控。著逮案究懲。寡婦申飭免喚。

(評)簡截了當。聽訟如神。

## 曖昧圖姦之妙批

樊樊山

接閱來稟。該令於訊鞫一道。頗肯用心。深堪喜悅。獲犯崔廣發。雖未認供。而据申胡氏供。喬稔身死之日。伊曾因胡氏賣物得銀。面去詢問。是夜即有入室殺人之事。而廣發又供。曾有人媒妁。擬以申胡氏配伊爲妻。因年大不成等語。兩供相勘。是平日圖奸。此日圖財。皆意中事。惟廣發果因竊財而往。則宜乘其睡熟。暗裏偷摸。何至將人拋至牀下。而摸索其牀上之錢。天下賊人斷無如是之膽大妄爲者。此事以情理揣之。胡氏與廣發者。怨婦壯夫。必先有曖昧不明之事。此番廣發查詢賣物錢文。在胡氏以爲既已捨身。何能捨財。而廣發以爲既非圖色。自應圖財。夤夜而往。先續舊後索錢。索而不與。則拖而毆之。及申喬稔驚起。相持不放。又喊稱認識。廣發於是頓起殺機。以爲滅口脫身之計。此案中一定之層次也。本司不過揣度而言。該令可照此訊供。或可得其實際。申胡氏果欲爲子報仇。亦必不差愧隱匿也。此繳。

老婦再醮之妙批

樊樊山

某老婦年已花甲。呈請再醮。樊山閱狀甚奇之。因作批示。並後附一詩云。五十八歲之老婦。情殷再醮。呈請立案。以杜後患等語。天地之大。無奇不有。贈爾一詩。以爲憑據。花甲週猶欠兩年。麻裙翻轉任伊穿。旁人若道長和短。但打官司莫給錢。

樊樊山

風水爭執之妙批

風水之說。樊山不信。關於風水。訴控每斥不准。其批王化顯所呈云。本縣向來不信風水。爾等愚民。偏要信堪輿之言。致滋爭訟。此案孫世錫在伊塋內葬母。爾信田陰陽之言。謂于爾不利。爾在墳旁築塔補脈。伊又信祔陰陽之言。云於伊不利。此事不必傳訊。着孫世錫明年不葬。爾王化顯永不築塔。彼此相安。豈不甚好。况墳角築塔。孤峯獨聳。不能補脈。轉恐妨丁。論其形模。更與僧墳無異。爾欲求嗣。豈可效法和尙乎。田江海不懂風水。騙爾謝儀。速與絕交。勿貽後悔。爾但聽本縣之言。多積陰德。少打官司。自然添丁進口。不必求之杳冥也。此飭。

## 逸女被棄之妙批

樊樊山

爾女徐鳳蓮如此會跑。從小在娘家已屢跑。送往婆家童養則又跑。不許伊跑。則尋自盡。今被婆家退回。竟無一人敢娶。似此跑來跑去。跑到何日是了。爾因此女嫁不家門。呈請立案。試問立案以後。伊卽不跑乎。卽有人承受乎。此等混帳東西。不如聽其自跑。免得害人。

## 天道好還之妙判

樊樊山

此案情節。昨日呈批盡之矣。陳裴氏千刀萬惡。舉國共憤。惟承審官委曲將順。必欲將已嫁之王劉氏。斷歸該氏具領。不歸則答押其娘屋之父兄。此理之最不可解者也。試思裴劉兩氏。姑媳之恩已絕。斷守節。不過折磨而死。若仍然嫁賣。則又何必使劉氏多嫁一人乎。況入該氏之手。勢必賣良爲賤。以少配老。但圖身價。不講天良。吾輩作官。縱不能積福。亦何苦作孽耶。劉世芳。遵斷主嫁。財禮六十串。全歸該氏收受。并無不合。乃該氏恃老恃潑。蔓訟不休。前任畏之如虎。將世芳父子遞換。責押二年之久。可爲長歎。陳裴氏潑悍。

奸貪逞刁健訟。累害劉姓。傾家敗產。劉世芳忿恨致疾。臥牀垂斃。著將該氏鞭背見血。以快人心。世芳長子劉老虎。卽日出押。歸告其父。勿再冤痛戕生。其存房財禮六十千。娘婆兩家各得一半。分別當堂具領。劉氏早已另家。應勿庸議。陳斐氏遞籍管束。取結完案。乃該案於斷結以後。猶敢當堂撒潑打滾。口稱拚命。查該氏從前將寡媳誑出東關。託言上墳。實則回籍。預僱長行車輛。在關外等候。被王氏看破哭喊。該氏喝同車夫。將王氏手足細綁。拋置車中。嗣經娘屋追回。以致成訟。今本縣卽以其人之道。還治其人之身。陳斐氏著將手足照樣細縛。與所分財禮三十串。一併擲置車內。卽日押解出城完事。

請假回籍之妙批

樊樊山

稟詞悱惻。展誦愴然。該令骨鐵心冰。艱苦卓絕。不嫌缺苦。不恤身勞。近於鹽稅貨厘。尤加整頓。顧麟游輪補。原非鸞鳳之棲。而馬鬣將封。尤篤鵲鳩之誼。請假回籍。三月爲期。情實可傷。理無不准。稟稱已寒姜被。復悼莊盆。甚矣死

喪之威。悽然房闕之地。憶君與我相見渭南。初典權場。始完花燭。昔賀君納婦。今見君悼亡。曾幾何時。悲歡頓異。微之喪偶。白江州遙助悲吟。貢父哭兄。蘇端明心傷俊傑。劉原父死東坡嘆曰何則復見此俊傑一乎臨文三嘆。贈子一言。早日言旋。良用自愛。仍候撫憲批示。繳。

鼠囓票據之妙批

某卡局聲稱票據被鼠齧。樊公卽援筆批云。

樊樊山

據稟該局櫃存釐票多張。忽被鼠囓。一則曰櫃底齧透兩孔。再則曰小捲十三張。齧撕不堪。又曰餘票微齧無礙。又曰十三張齧扯碎腐。其究竟則曰卑局此等奇齧。實難預料。卑職疎忽之咎。懇乞核鑒。施銷等語。事本尋常。文特奧異。既不合疏防開參之例。亦難加比捕嚴緝之批。碎票查銷。奇文存案。可也。因憶同治間。蒲城縣令稟牘。有該螞蚱尙知自愛。聞風俱已遠颺之語。三十年來。一鼠一蟲。遙遙相對。何吾陝多文吏耶。繳。

招夫養子之妙批

樊樊山

孀婦陳鄭氏。畧有積蓄。與里中無賴根遂兒通。旋金盡而無賴亦去。質之。以有原配對。氏不得已。具呈請追其財。樊山爲批云。

招夫養子。最爲敝俗。爾以孤孀。招根遂兒爲夫。原圖養贍。乃一無所得。反將所蓄之二百八十串錢。盡爲所耗。近則錢盡而人亦不至。且以娶有原配爲詞。揆厥事情。恐左阿婆。非媒灼也。乃牽頭也。爾與根遂兒。非嫁娶也。乃苟合也。以苟合始。以離異終。男女二人。混帳已極。候喚案一併重責。以爲不要臉者戒。

僧丐興訟之妙批

樊樊山

閱稟失笑。住持指佛地要錢。情同訛詐。和尙留貧婆住廟。跡涉嫌疑。十五兩之租銀。有何證據。六十名之女丐。大費張羅。何期四大皆空。惟知圖利。更訝六根俱淨。猶尙多情。積一年未領之租銀。僧錄司僧綱司何不具呈請獎。合兩廠無歸之男女。優婆夷優婆塞。何妨披剃從師。說語無憑。居心難問。無端募化。大有藏神修廟宇之心。懲爾貪癡。當引和尙拜丈母之例。

## 翻賣髮妻之妙批

樊樊山

此案轎夫陳明山擅賣髮妻。一罪也。既賣復翻。二罪也。控縣過堂。斷令彼還妻。而此還銀。而該轎夫延不交銀。三罪也。捏造無情無理之詞。誣搶誣拐。率行上控。四罪也。現在雖經交銀。豈能免打。彼昏昏之娶主。買買之媒人。可東可西之蕩婦。雖皆可打。然非陳明山起意賣休。則彼三人皆不致自投羅網。是此一案。惟有重責該轎夫了事。陳明山著枷號十日。期滿重笞取保。餘人可打可不打也。繳原詞存。

## 妄想老婆之妙批

樊樊山

我看你想老婆想瘋了。既銀有數十兩。何不卽在本地辦娶。而必攜銀出外。央媒說親。迨張貴林謊稱作媒。爾遂買買然借給銀三兩八錢。足足一年。並無入與爾議婚。爾亦可以醒悟矣。乃今正又買買然至伊村設館。至則不但老婆無望。並館地亦爲人所奪。爲秀才者。到此地步。惟當自悔自怨。卽日回家。乃自正月二十四至二月十三。逗遛該村。戀戀不捨。試問此二十日中。爾

究在何處安身乎。伊借爾銀三兩有餘。爾用回銅錢五百。爾幼子又在伊家吃飯。以此計之。縱欠亦屬無幾。何至因此小事。打搥飾傷。瀆控似此糊塗。浪蕩。實屬有忝士林。著候驗傷再奪。

調戲幼女之妙批

樊樊山

據稟李炳星卽李竹坪。於光緒二十二年。得鄒故令之子婦通姦。唆該本夫藏匿。以免其叔鄒佩囉皂。被鄒佩告發。訊明遞籍管束。尙有數紙情詩。存於縣卷。二十六年來。陝臆捐巡檢。現充南局查街委員。昨歲賃居張河台前院。張氏門祚凋零。僅一風癱孀婦。炳星母事之。妹其女。而弟其子。積欠三月房金。移居他處。猶復勾誘十三歲養子張百福。游蕩徵逐。盜典衣裳。又調戲其十七歲之女。女批其頰。乃益唆其姊弟不睦。本月二十二日二更後。炳星借尋百福爲名。帶領局差。敲門入室。將其姊拖入中庭。穢詈兇毆。女情急奔訴縣案。驗明傷痕在卷。旋經臬司鎖拏該巡檢到案。發縣審訊。三造環質。各供前情不諱。溯查帳捐冗濫。鼯鼠皆官。至於淫惡昏狂如李炳星者。則衣冠中

固無斯敗類。卽禽獸中亦罕與比倫。曩者淫人之妻。自作孽而罹天網。今者賊人之子。夜無故而入人家。始挾投梭之嫌。繼爲反間之計。離人骨肉。適啟螟蛉之心。奮彼老拳。傷在螭螻之領。更騰含血之口。謂有解佩之情。意將誣以無媒之奔。示自撻其未婚之婦。顛冥至此。誅不勝誅。案旣質明。應卽斷結。仰俟會同臬司。將李炳星詳請咨革。准如該縣所擬。照兇惡棍徒例。發極邊烟瘴充軍。係職官應從重發往軍台效力贖罪。仍於起解之前。重笞百板。枷號十日。押赴張河台門首示衆。嗟乎眇茲一日。集炳星眼當夜半而瞎馬臨深。送汝長征。投直北而豺狼不食。遂爲令戒。汚我丹臺。仍候臬司批示。繳。

## 巾幗鬚眉之妙批

樊樊山

據該稟女學學堂艱楚情形。可爲憫歎。巾幗且知好義。鬚眉那得恁然。候飭縣立提牛捐董事等。從嚴催比。務使月清月欸。源源收解。以弼陰教。而助巧炊。各該女士等。亦宜循規蹈矩。勤習學科。名譽一振。人人佩服。則不患無財用矣。此繳。

勝字成姦之妙判

樊樊山

馮景立者。故湖南臬司咸陽馮公之第三子也。母張氏。馮公官湖南。長次兩子俱早世。長媳僅存。無子買他人子爲嗣。小名麻雀。馮母有婢曰毛子。皆豸種也。馮公歿。盡室還秦。景立素不得母歡。乃攜妻居咸陽。母留省城。時長媳亦故。母以毛子爲義女。麻雀爲孫。僦居西安累年。張祖石者。幼爲馮氏書僮。及長充長隨。略識文字。光緒十六年。貧無聊賴。往投馮母。母老且憤。遽令爲麻雀師家事。內倚毛子。外託祖石。居旣久。張遂與毛子私。馮氏故顯宦。貲裝甚豐。歸里後。母子異心。餘貲略盡。母以收債自給。十七年春。馮母持券詣咸陽。祖石盡攫其箱篋服玩。攬毛子捆載而逸。張秀才漢爲馮母之姪。聞信追回。控諸前任。遷延累月。居間者令祖石以贖物還馮。毛子別嫁。具息銷案。方毛子之被追還省也。歸馮不可。適馮不能。寄居長隨婁姓所。婁與司書程福善賭博至交。程心豔毛子。乃以三百金娶之。婁爲媒。而張漢主婚。繼又詣馮反馬。馮母亦忘其爲逃婢。善視之。福善夫婦。尋卽移居其宅。主持家事。牢籠

麻雀日集博徒。呼盧飲啖。侵盜財物。銅鑿玉帛。獲燕之屬。斥賣畧盡。麻雀年十六。尤頑鈍不肖。常持官燕易糖果。馮母一無所問。十八年春。馮母病歿。景立自咸陽奔喪來歸。福善集黨痛毆之。隣人劉桂元趨視。併傷桂元。景立具控到案。則本縣視事兩月矣。通查全案。程福善罪固當誅。張祖石法尤難貸。一併逮案候鞫。案猶未集。福善復率人與景立陰畔。奪麻雀去。尋控景立毆傷其妻。沒其囊篋數事。又假麻雀之名。控其三叔不孝。祖母臨沒。書立遺囑。家產悉以與孫。交其姑壻照筭。而景立亦控稱福善夫婦盜賣衣物。悉經廚廝某甲之手。廚廝具有簿記。所耗不貲。迭經飭差搜索。僅由質庫起得古鼎一事。福善呈出官燕數盒。餘物不可問矣。今經集訊各供。前情無異。馮景立身爲人子。置七旬老母於不顧。身非織屨。效仲子之處於陵。見必及泉。類鄭莊之誓姜氏。謂之不孝。何說之辭。第念家業蕩然。又儼然在縗絰之中。從寬免責。毛子下流淫賤。娼妓不如。隨地成雙。似來往兩家之燕子。所天非一如待於二境之犧牲。馮氏拖卵成雞。不馴反啄。開籠放鴿。已去仍來。取一家物。

以與一家從一壻亡。又更一壻。似此天良盡絕。允宜撻詈兼施。司書程福善。佻達無行。貪淫鮮恥。相逢蔓草。何殊蛇與雉交。強附絲蘿。竟爾鳩居鵲舍。營之雁鼎。假手於冰人。鼎姓轉當妻秦之狐裘。竟淪於狗盜。猶復依憑城社。誘引良家。瞰馮母之將亡。呼博徒而共集。及至新喪在殯。嫡嗣言歸。乃效兵家反客為主之謀。思援春秋舍子立孫之義。矯稱遺命。盡盜家財。招集狂徒。毆打宦裔。語其罪惡。罄竹難書。試以奇刑。入甕非酷。張祖石馮家廝養。抗顏言師。以西席之先生。搜東家之處子。息侯去國。哼哼聞大車之聲。張以大車三輛捆載而去申公竊妻。欣欣有桑中之喜。及追騎踵至。縣符迭傳。乃以還珠之謀。幸逃盜肉之磔。聽訟者如士師入夢。不問覆鹿之有無。竊負者如魯盜還弓。一任陽虎之來去。本縣慣翻前案。罔赦淫人。豺狼就擒。必旁問狐狸之罪。蝦蟆斷尾。仍追求蠅蚪之時。飛索縹來。重杵迭下。福善與祖石。情同麀聚。罪比輪姦。昔者放馬佚牛。書馬牛其風。字作放佚解。不僅風流之過。今者家雞野鷺。合成爛字之形。飭將程張二人。一併痛笞。無算。各枷號三月。以快人心。復據張漢供稱。財禮三百。

金福善僅持出三分之一。斷令補交。雙柏與銅鼎燕菜。一併給景立具領。毛子仍歸福善。麻雀歸福善所匿。始終不出。此子偶然拾得。本屬下流。昔鄭伯曰勿滋他族。邱遲曰無取雜種。特烏鵲已無棲處。而桑枝原有寄生。諭令景立來則收之。不歸亦聽之。在福善已非奇貨之可居。在景立當念遺簪之不棄。張漢劉桂元妻姓桂。及廚某甲。各已供明。飭回安業。獨念馮氏生爲顯宦。歿有贏金。卒以母子離心。他人入室。簪纓墮地。奴婢欺人。使馮公地下有知。得不愧李嶠之無兒。而恨獨孤之誤我乎。吁。可以鑒已。

(評)洋洋灑灑。典麗喬皇。敘事則委曲有情。折獄則愜心貴當。此樊山判牘之所以爲世傳誦也。

諧判附錄

雅賊偷花之諧判

張江村

勘得芝蘭獨秀。欲茂庭階。桃李不言。自成蹊徑。至如盜武昌之柳。竊元獻之

梅猶物招人。匪今伊始。若十姊妹者。嘗廿四番之花信。門十二客之修容。豔誇宋玉牆頭。開待楊妃醉後。縱遜牡丹專貴。看到子孫。已同萱草忘憂。視爲兒女。止合買麗娟之笑。那堪拋霍定之錢。何物蜂狂。竟行鼠竊。執柯以伐。墮粉零脂。承筐相將。驚紅駭綠。豈是嫦娥之桂。任吳剛斫之而無妨。猶非黃母之桃。乃曼倩偷之而竟去。恍如螻蟻。拋花瓣於東鄰。絕似螟螣。害嘉禾於南畝。按厥踰垣之罪。則足何辭。揆其升木之愆。折肱非過。顧投鼠必先。夫忌器攘雞。或待於來年。偶爲長者折枝。未盡千年之綠。矧與佳人助態。將傳一捻之紅。論情尙有可原。執法還宜稍待。倘云宣武之桃。堪妒。再問桃源。必至崑岡之玉不分。開其玉股。慎當斂跡。勿悔噬臍。此判。

男貢女約之諧判

袁隨園

勸得自媒之恥。君子所譏。偕老之盟。世人不免。以禮自持。但願他年連理。爲情所引。遂致一度春風。楊柳陌頭之色。望眼將穿。梧桐雨裏之聲。柔腸欲斷。舊夢覺而已迷。名羞杜牧。新歡迷而忘返。行薄王魁。痛思往事。未可明言。血

染闌干。不堪回首。負心郎。當墮入泥犁。癡心女。庶畧消怨憤。此判。

女負男約之諧判

袁隨園

勘得驀地因緣。無非野鷺。後時懊惱。不是家雞。鶯聲燕語。早消烈士心肝。蝶亂蜂迷。見得英雄面目。夜半閒敲棋子。往事休提。門前又放桃花。玉人伊在。方領溫柔。誓同衾枕。忽成羅刹。別抱琵琶。務將慧劍一揮。不使情魔再擾。此判。

名花妖嬈之諧判

王漁洋

訪得十姊妹者。形若薔薇。品殊玫瑰。藏勾露刺。希圖釣弋之謀。淡白嫣紅。變幻華清之態。偶然聯袂。欲妒喬家。抑或比肩。敢僭趙氏。匪心貞而守寂。覺容冶而誨淫。展半面於枝頭。媚嘗掩袖。裊纖腰於葉底。弱不勝衣。况乎含笑。以比東風。結羣以傾南國也哉。若夫蠢爾踰垣。初訝過牆之蝶。驀然升木。幾疑抱樹之猿。於是共慘墜樓。空憐飄溷。覩芳菲之狼藉。是可忍乎。扶花蔓之雁行。有由然也。仰河陽城縣令。鞭笞佻達。充作橘奴。飭臨芳殿夫人。禁錮妖嬈。

謫爲菊婢。弗謂殺其風景。庶幾息此爭端。既可懲戕賊之狂。亦足示嬌憨之戒。

雅賊偷花之諧判

王漁洋

北堂寸草。尙足忘憂。東閣孤芳。猶堪遣興。况夫花團錦簇。儼然翠繞珠圍。燦爛庭前。姊妹爭妍而鬥豔。徘徊株下。主人惜玉而憐香。正當累土培根。方擬鳩工而作架。何來暴客紛紛。結黨摧殘。更有頑童旦旦。踰牆攀折。豈是飄零風雨。妝洗西施。胡爲剪伐甘棠。毒流南國。允宜拘此害苗之莠。安可寬夫鑽刺之刑。仰花縣斬彼根株。命園丁除其萌蘖。雖然案牘勞形。亦屬衙齋佳話。

老夫少妻之諧判

張船山

照得三十而娶。古禮爲昭。畢世不婚。人情何在。或驅車遠役。致羈跨鳳之期。或改絃更張。重譜求凰之調。思染烏鬚以媚內。無如明鏡笑人。欲加精力以求歡。全仗醫方助我。未能忘情。正值破瓜之日。卽曰善戰。已當天命之年。老新郎不堪強項。曲意逢迎。好女子何必含顰。一心順受。用問罪於月老。俾雪

恨於嫦娥。此判。

少夫老妻之諧判

張船山

照得婦人無子。七出有條。童子何知。齊眉妄說。只緣迨其吉兮。標梅致歎。若能漸入佳境。食蔗何妨。良朋見面。錯將慈母之稱。鄰媪談心。羞聽娘行之語。未肯塗脂抹粉。固爾老成。若論齒豁頭童。難乎老醜。仙杵懸而無用。蚌胎結以何年。主持中饋。俾操井臼之勞。嚙彼小星。另覓閨房之樂。各無異言。斯爲允斷。此判。

翁戲子妾之諧判

端午橋

好色原關天性。儘可問柳尋花。見女而起淫心。當顧尊卑長幼。所以法定殺人者死。惟拒奸者殊科。律訂弑父者刑。獨犯姦者別論。蓋以之防獸行。勵風化也。楊某枉爲翰苑清才。新擢黃堂太守。治民之政聲未著。亂倫之穢德先彰。老悖不仁。忽萌聚麀之想。妄行無忌。謬賡新臺之章。當小媳初試蘭湯。羅襦盡解。而阿翁竟入閨闈。簾幙扯除。此時試浴美人。一絲未挂。無地可容。兩

頰暈羞。奪門而遁。楊某睹此出水芙蓉。遠勝籠烟芍藥。情不自禁。妄加非禮。強親櫻口。被嚙髭唇。一則鮮血直流。一則嬌聲極喚。雛婢聞聲奔視。乃翁潛地脫逃。楊子聞知。憤無可洩。公庭面稟。罪實難寬。祇因名宦家風。不忍醜聲遠播。某宜卽離家赴任。以避子嗔媳怒可也。此批。

妻妾爭寵之諧判

繆蓮仙

勤得金屋藏嬌。人生樂事。後庭度曲。絕世風流。始也得隴望蜀。心則太奢。繼也逐北征南。力有不足。洞口桃開。無復漁舟問訊。爐中丹冷。空勞繡被薰香。此所以內外交疑。而爭端百出也。打草驚蛇。活孤孀徒自苦耳。守株待兔。喜菩薩善自圖之。家主不善於調停。闢割敢貽夫後悔。此判。

兄私弟婦之諧判

繆蓮仙

勘得古有行之。推梨讓棗。此何事也。李代桃僵。窄襟短袖。固由冶容取憐。飲糟啜鋪。未免篤倫太甚。白璧本有微瑕。一誤再誤。狡兔那無三窟。何去何從。豈阿兄老而無妻。急不暇擇。抑乃弟幼而盜嫂。過以相償。總之淫惡實大德。

之踰。兄弟。豈同胞之愛。此判。

詳註新評  
現代實用  
刀筆精華錄

卷四 民刑判詞

我有筆如刀室主編

債務糾葛之判決書

沈義和何慶麟因請求清償債務涉訟。慶麟不服上海租界臨時法院於中華民國十七年六月十九日所爲第一審判決。因請律師提起上訴。此上海租界上訴院之民事判決書也。

主文

上訴駁回

上訴費用由上訴人負擔

事實

上訴人聲明請爲撤銷原判決。駁回被上訴人第一審請求之判決。其主張

事實略謂上訴人菜社。每日用肉。均由被上訴人包送。交易已九年之久。共計價洋十六萬元有奇。所欠三千餘元。乃歷年尾欠。依商家慣例。本可抹除。去年冬月間。被上訴人曾向上訴人要求如此。後現洋交易。此款准即取消。故至此以後。每日取肉當晚即行付款。有所立貨摺可查。且上訴人菜社虧負外債。不止被上訴人一家。前經債權人公議。共同維持前欠。作爲拋棄。亦有所派監督營業之賬房王憶猛可證。被上訴人就已取消之債務復行控追。原審未能覺察。竟判令償還。殊難甘服等語。被上訴人主張略謂所求償之肉價。乃上年九十月間拖欠。並非歷年尾數。嗣因欠數已鉅。不能再有掛欠。故於冬月間要求。每日付現。至以前欠款。上訴人亦迭次約期清還。並無取銷之事。債權人會議。未邀被上訴人到場與聞。究竟有無其事。亦不得而知。應請駁回上訴等語。

## 理由

本院按金錢債權。不容有履行不能之觀念。故債務之應當清償者。除債權

人有特別之意思表示外。債務人不得以資力不充。或其他理由。反乎債權人之意思。而主張減免。或展緩。本件訟爭債款。關於數額兩造。並無爭執。惟據上訴人主張。乃逐年尾欠。被上訴人曾承認取銷。不應再行索償。第檢閱被上訴人提出之賬摺。該款之大部分。乃上年九十月間所拖欠。上訴人謂係歷年尾數。既屬無據。且要求減免。債務應得債權人之承諾。縱令尾欠有時。可以取銷。而上訴人既不能證明。被上訴人曾有此意思表示。即不得主張其債務已經消滅。況據兩造所開賬單。自上年冬月現款交易後。逐月付款。多有長餘。故上年十月終。原欠洋三千九百餘元。至本年三月。已減為三千八百餘元。雖所減為數無多。而在冬月以後。上訴人對於前欠仍隨時給付。要可概見。是尤足證該債務依然存在。則其因約定現款交易。遂將前欠取消之主張。自屬不可憑信。至證人王憶猛所稱。各債權人會議。維持前欠。緩還各節。並不能證明已得被上訴人之同意。即使他債權人有此決議。要亦不能強令被上訴人受其拘束。原判命上訴人即為清償。並無不合上訴

論旨均非有理。

據上論斷。本件上訴爲無理由。依修正前會審公廨民事訴訟律第一百零三條第一款。民事訴訟條例第百零三條。特爲判決如主文。

上海租界上訴院民事庭

審判長推事胡詒穀

推事韓祖植

推事仇 預

中華民國十八年十月四日作成

交款涉訟之判決書

江蘇上海地方法院民事判決十六年地字第三〇四號一七一、一一送達  
判決

原告 舒占元住勞勃生路一四五八號

右訴訟代理人 吳寶地律師

譚毅公律師

單毓華律師

被告卽反訴人

勞卞寶住南市豆市街晉泰祥豆米行

右訴訟代理人

吳麟坤律師

姚文壽律師

袁漢雲律師

王黼裳律師

右兩造爲交款涉訟一案。本院審理判決如左。

主文

被告經理之晉泰祥。應償還原告之仁泰公司九八規元四萬兩。并應給付自民國十六年陽歷十月十五日起。至執行終了日止。按月九厘之利息。原告假執行之聲請。及被告之反訴均駁斥。

本案反訴訟費。由被告經理之晉泰祥負擔。假執行聲請之費用。由原告經

理之仁泰公司負擔。

事實

原告聲明請判令被告償還九八規元四萬兩。并給付自本年陽歷十月十五日起。至執行終了日止。按月九厘之利息。駁斥被告之反訴。訟費令被告負擔。關於判令被告償還之款。請予假執行其陳述事實。略稱。原告係仁泰公司經理。與晉泰祥之經理。即被告。相識有年。本年十月十四日。被告函懇墊銀四萬兩。向中法工商銀行贖取洋米七千一百八十餘包之提單。即交作抵。倘無款取贖。恐被拍賣。原告信以為真。即於次日向春元衡九兩莊出立四萬兩莊票兩紙。隨即交付。不料被告祇交來二千包之提單四紙。尚有五千包之提單。任催不交。茲反謂原告公司內。向被告行內定米七百噸。一再展期不取。最後無期可展。乃交半價銀四萬兩。工商銀行以米價跌落。祇付二千包提單等語為抵塞。并提出原告於本年陰歷六月十三日作廢之成單為證。不知該成單之米。係被告向美德洋行所定後。因銀行不允作押。

匯將定單取消業由張福林霍爾士瓦斯證明。并查成單之日期。及米價與被告交出二千包提單之日期。及米價全不相符。顯係藉作廢成單。以爲影射。至本案債額甚鉅。而保戶升泰號全部財產。僅有一千四百兩。將來執行勢必異常困難。請予依法假執行等語。

被告聲名請駁斥原告之訴。與假執行之聲請。并依反訴聲明。判令原告之仁泰公司。償還米款元八千七百〇五兩七錢二分二厘。及自本年陰曆十月十二日起。至執行終了日止之遲延利息。訟費由原告負擔。其答辯陳述。略稱。我於本年陽曆七月一日（陰曆六月初三日）由武立侯經手定西貢米一千五百噸。內係賣與潘義泰七百噸。仁泰公司七百噸。其賣與仁泰公司者。當時依照米業仁穀公所定章。填就三聯定單。除一聯存根外。其餘兩聯。由兩造互執。該單註明每百斤價銀六兩五錢八分。期訂陽曆七月十六號。由產地裝輪後。於陰曆七月十四日（陽曆八月十一日）到一萬零一百七十幾包。即於翌日以字條通知仁泰公司取米。他商請展期一月。出清。屆

期又請展期一月。嗣後期限又滿。不能再展。乃付半價銀四萬兩。商請出米一半。不料工商銀行以米價跌落。只允付二千包之提單。被告遂將該提單交於原告。至晉泰祥向美德洋行定米一千三百噸。在七月十幾裏。是替杭州震大代買。後因貨不到。即行取消。其取消原因。美德洋行以押櫃開不出。曾經寫信把我。我也有信回覆。把他此項定米與向武立侯之定米。截然兩事。有定單爲憑。如果謂該定單即美德洋行之米。已經取消。何以定單未由原告收回。該原告又何肯付半價洋四萬兩。現查該米七百噸之價額。以每百斤六兩五錢八分計算。結至本年十月初一日止。計欠本利銀七萬八千五百八十九兩九錢五分二厘。除收到四萬兩外。尚欠三萬八千七百〇五兩七錢二分二厘。應由原告之公司給付。將五千一百八十七包之提單取回。并給付自本年陰曆十月十二日起。至執行日止之遲延利息。至被告係晉泰祥經理。如加以假執行。嗣後必有不可計算之損害。請將假執行之聲請駁斥等語。提出定單一紙。英文信稿二紙。英文合同一紙。爲證。

理由

本案先決問題爲晉泰祥與美德洋行定米之合同有無取消。如已取消。是否連仁泰公司向晉泰祥於本年陰曆六月十三日定米之定單亦一併取消。此點解決。而本案係爭之款。是否爲抵款。應由晉泰祥償還。抑爲米款。應由仁泰公司照約履行之問題。自可迎刃而解。查晉泰祥於本年陽曆七月八日。向美德洋行定米一千三百噸。已經訂立合同。嗣因該洋行不能開出押櫃。遂將合同取消。業經被告及霍爾士瓦斯供認在卷。（見本年十一月二十六日筆錄）毋庸研究。應研究者。該合同內是否有七百噸米。由晉泰祥賣與仁泰公司。與之訂立本年陰曆六月十三日之定單。是已訊據被告所供。晉泰祥於本年陰曆六月間。向武立侯定米一千五百噸。內賣與仁泰公司與潘義泰各七百噸。其賣與仁泰公司者。即與之訂立陰曆六月十三日定單等語。查該定單所載。爲米七百噸。每百斤價元六兩五錢八分。長粒二成半。碎粒期訂陽曆七月十六號。產地裝輪核與晉泰祥向美德洋行定

米之洋文合同。所載品類。價額。裝輪日期。及成分。（合同載長粒西貢頭號米其中約有百分之二十五。破粒字樣百分之二十五。即係十分之二五）相同。反與該行與武立侯定米之訂約期間。（武立侯供陽曆七月一日）米價。（武立侯供每百斤六兩四錢五分）及裝輪日期。（武立侯供第一批八月三日。第二批八月十二日）全相刺謬。是該定單爲仁泰公司向晉泰祥所定。（即係美德洋行之米）與被告行內向武立侯所定者。截然兩事。不能牽混。惟晉泰祥與美德洋行定米之合同。業經取消。有如上所述。則該定單是否亦在取消之列。是在審查該定單之內容如何。以爲判斷根據。查該定單內。起首即批明安德洋行代單六字。（安德洋行即美德洋行）係被告行內夥友寫錯。（見被告本年十月十八日供詞）所謂代單者。即以此單代理洋行定單之謂。其實際即與洋行出立之定單無異。故單內註明一切悉照後幅所訂規約辦理。察核後幅規約。第四款載洋行定單章程。載明如船內所裝之米。（中略）或遲到。或僅到一部分。或全部可停頓。則應將本合同取消。

作廢。賣出人不負踐約責任等云。本公司同業自應查照辦等語。可知定米全部停頓。契約即行取消。規定於洋行定單章程。仁穀公所同業即根據該章程辦理。則此項定單。當然亦在取消之列。然定單取消。而定單之本身。仍由被告行內執有未曾退還。是否可持爲廢約。後損害賠償之憑據。此係另一問題。要不能認爲有效。而令晉泰祥照約履行。乃被告辯稱。安德洋行代單六字。係原告說不要。故由我圈去。（見本年十一月四日筆錄）推其用意。以該字由原告授意圈去。則與該行定貨無關。自不受洋行定單章程之拘束。然查被告本年十一月廿六日所供。又稱定單上安德洋行是我所寫。本來所定貨有另外朋友要買。我想將安德洋行的賣把了。原告過了幾天。他說不要。所以圈脫等語。核與前供不符。則其前次所供原告授意云云。顯係任意捏造。準是以論。仁泰公司於本年陰曆六月十三日。向被告行內所定之米。既已取消。而被告行內向武立侯所定之米。又非仁泰公司所定。則仁泰公司對於該米。毫無責任可言。豈能無故交款於被告。據原告主張。被告

向原告商懇墊銀四萬兩。向中法工商銀行取去七百噸米之提單。即以作抵等語。自屬可信。乃被告取得該項墊款。僅交付原告二千包米之提單。原告恐債權受損。訴請返還墊款。并從墊款日起。按月九厘付息。至執行終了之日爲止。尙無不合。本案係爭之款。既屬認定爲抵款。則被告之反訴。當然無理由之可言。至原告聲請假執行部分。業據被告聲稱。如果假執行。日後必有不回復之損害。依照民訴條例第四百六十四條。礙難准許。爰判令被告行內。抵用仁泰公司九八規元四萬兩。如數償還。并應履行按月九厘之利息。被告反訴。及原告假執行之聲請。既無理由。應予駁斥。訴訟費用。由原告公司負擔外。餘均依民事訴訟條例第九十七條。由被告經理之晉泰祥行內負擔。特爲判決如主文。

中華民國十六年十二月廿四日

江蘇上海地方法院民一庭

推事簡 炅

書記管馮邦彥

梟兒弑父之判牘

張駕雲。工盤剝。善買遷。設米肆于浦東三林塘。歷年居積。頗有資產。子欣生。沉浸煙賭。駕雲時呵斥之。欣生懟父甚。又以索錢不遂。因萌弑父之心。會有賭棍朱潮生。朱健臣與欣生善。間嘗白以己意。潮生健臣遂爲代購毒藥。要以巨金。囑欣生攜歸密置其父燕窩粥中而死之。旋朱潮生以欣生背約而告發。被處死刑。

查閱訴訟記錄。已死張駕雲。經原檢察廳檢骨斷定。其係生前因毒身死。張欣生於驗明中毒後。即將朱潮生如何因誘賭勸令毒父。如何令幼女秋林先後來叫。當同朱健臣立給六百元許據。旋又交與白粉一包。嗣復一再催促下手。及至前年臘月二十七日早晨。如何將白粉置之燕窩粥內。伊父食後。如何嘔吐。卽於當夜身死。事後如何經朱潮生等催款。交與朱潮生洋三百元。言之歷歷如繪。其在豫審中。迭供亦無異辭。合以其母康氏供稱。當日

張駕雲嘔吐情形。張駕雲之死。由於中毒。而中毒由張欣生所下。已屬毫無疑義。朱健臣於偵查以後。雖否認買毒藥之事。然或供由張欣生自買。或供係朱潮生代買。既已前後不符。況其警所之供。已自承有買藥之事。雖據辯稱毒狗。然又探聞張欣生想藥死伊父。我欲索回原藥。嗣將張欣生尋到。立有筆據一紙。詎料事已做成。錢則不給。嗣經索取。迭次收到洋元等語。朱潮生所呈交產過割字樣。核其筆迹。又與朱健臣筆迹無殊。該據上復明明有賠償藥本之語。則張欣生所下之毒。確由朱健臣代買。且明知係供毒父之用。亦屬顯而易見。朱潮生呈出抄錄張欣生許據。上載中人爲孫慕賢。查孫慕賢既確有其人。且在三林塘居住。乃朱潮生於偵查中一再供稱。實無其人。其有所隱避。已可想見。卽張欣生朱健臣一致供稱。原中係朱潮生。自屬可信。況原據一紙。附據稱已交還張欣生。且又迭次稱沒有人見。張欣生復極端否認。如果朱潮生僅於此事後出任調人。與殺人之舉。並無關係。則何所忌憚。而不將原據呈案。此中情事。亦自瞭然。則知張欣生所爲不利自己。

之供。於朱潮生教唆殺父始末。前後並無異致者。其非出於誣扳。亦可斷定。再據張欣生供稱。朱潮生茶店。前樓住家眷。並設煙舖二三張。後樓設有賭桌三四張。麻雀骰子牌九都有。朱健臣供稱。我是吸鴉片煙的。去年七八月間。我在朱潮生樓上吸煙。朱潮生樓上有牌九麻雀。並有抽頭的。我賣給張欣生煙膏四五百盒。計洋兩角一盒。朱潮生供稱。我茶樓上只有二具麻雀牌。十箇銅板抽一箇銅板的頭。我因單賣茶不夠開支。還有一張寶桌。骰子盆一箇等語。合以原檢察廳在朱潮生樓上搜出之骰子盆及煙灰等物。則朱健臣販賣及吸食鴉片煙。朱潮生開設館舍。供人吸食鴉片煙。並聚眾開設賭場營利各事實。亦屬供證確鑿。絕無翻異餘地。原審因張欣生就殺尊親屬罪刑部分。聲明控訴。認第一審判決適用刑律第三百十二條第三百三十一條第四十六條。並與所處張欣生吸食鴉片煙罪刑。依第二十三條第一款。執定行死刑。褫奪公權全部終身。爲無不合。將張欣生之控訴駁回。自屬允協。並認第一審判決。於朱健臣殺人部份。適用刑律第三十一條第

一項第三百十一條論罪。又於其販賣並吸食鴉片煙各部份。適用刑律第二百六十六條第二百七十一條第二十三條。分別論罪科刑。爲無錯誤。復以第一審判決。於朱潮生殺人部分。適用刑律第三十一條第一項。律以事前幫助殺人之罪。爲有未是。改依刑律第三十條第一項第三百十一條論罪。因之於其開設館舍供人吸食鴉片煙。並聚衆開設賭場營利各部分。亦改依刑律第二百六十九條第二百七十八條第二百八十二條第四十六條第三十三條分別論罪科刑。又扣押在案之骰子盆兩只。煙灰一包。改依刑律第四十八條沒收。法律之見解。亦無不合。張欣生上告意旨。乃稱自白係由誤解。檢驗結果。已與自白不符。原判所憑物證人證。均非真實。朱健臣上告意旨。於販賣鴉片煙吸食鴉片煙部分。並未置辯。於殺人部分。乃稱警所口供。原不足據。許據並非張欣生交於自己。過割據亦屬偽造。張欣生朱健臣辯護人追加意旨。則稱檢驗結果。殊不可信。自白遠於人情。張欣生毒父既有可疑。朱健臣責任更屬難定。朱潮生上告意旨。乃稱自己係於事後

與聞索款。張欣生之自白。係屬誣扳。分厘烟灰。何能供給顧客。不全賭具。亦祇供娛樂之用。並無聚賭營利之自白。其辯護人追加意旨。雖臚列多點。然亦不過就上告意旨。推闡其說。均難認爲有理由。惟查朱健臣事前幫助殺人。與朱潮生教唆殺人。其均有預謀情形。至爲明顯。第一審判決。於朱健臣殺人。既未通同呈准科刑標準條例第一條第一款科刑。原審不予糾正。又於改處朱潮生教唆殺人罪後。亦未適用同條例同案款科刑。均屬違法。依以上論結。原判及第一審判決。關於朱健臣殺人罪刑及執行刑。並原判關於朱健臣殺人罪刑及執行刑之部分。均撤銷。上告人朱健臣殺人之所爲。應依刑律第三十一條第一項第三十三條第二項第三百十一條。呈准科刑標準條例第二條第一款。合以原處販賣鴉片煙。及吸食鴉片煙各罪刑。並依律第九條前段第二十三條第二項第三百十一條。呈准科刑標準條例第二條第一款。合以原處開設館舍供人吸食鴉片及聚衆開設賭場營利各罪刑。於主刑應依刑律第九條前段第二十三條第一款前段處斷。其

他部份之上告無理由。應即駁回。又本件上告合於本院現行書面審理之事例。故諮詢總檢察廳檢察官翁敬棠之意見。用書面審理。

主僕成姦之判決書

(2) 最高法院判決書

最高法院刑事判決十八年上字二八七號

上訴人 陸根榮 男 二十三歲

選任辯護人 宋銘勳律師

右上訴人因略誘竊盜案不服江蘇高等法院民國十七年十月二十七日第二審判決提起上訴本院判決如左

主文

原判決撤銷發回江蘇高等法院更爲審判

理由

查閱卷宗。上訴人與黃朱氏之女黃慧如通姦同逃。固爲上訴人所不爭之

事實。唯原判決認爲圖姦略誘。係以上訴人未將家內已有妻室告知黃慧如。先以詐術誘姦。致令失身。以爲拐取手段。爲唯一論據。但查上訴人之通姦事。在上年舊歷正月。與黃慧如同逃。則在舊歷六月。據黃慧如在第一審供稱。我因看他良心好。所以同他姘的。出來也是我的意思。因爲我有喜出來的。他並沒有叫我跟他走的。又在原審供稱。他來還舖蓋。聽女用人說他要走了。我就下樓去。在客堂裏遇見他的。我要同他一道走。他不肯。他始終沒有允許。十三日我自己僱的汽車。到的吳淞。住王家三四天。經詰以「他家裏已有妻室。你知道麼。」答稱。知道的。是他後來告訴過我的。我要跟他。他說一個女人養不好。養不起兩個。又詰以「這話是什麼時候說的。」答稱「五月底他對我的。因爲我一定要跟他走他說的。」又詰以「你今年正月間曉得麼。」復據答稱「我已經曉得的了。」各等語。是其通姦係單純爲性感之衝動。而同逃乃別有特別之原因。不能謂其行姦以前。卽已預存拐意。姑無論上訴人是否五月底。始向告知家有妻室。或黃慧如已於

正月間。卽已知其有妻。而略誘罪之詐術手段。必以積極的行其機詐之方。畧致使被害人陷於意思之錯誤爲條件。上訴人所稱。我有女人未娶云云。是否虛僞。尙未證明。縱其已娶。而僅未以有妻相告。並無何種設計捏造其無妻之事實以爲欺騙。自亦不得遽謂爲行詐。況黃慧如於正月間。卽已知其有妻。五月底上訴復以養不起兩人之語告之。迨至六月。始由黃慧如商允同逃。徵之前敘。黃慧如之供述。旣已確而有徵。原審認定數月以前之通姦爲誘姦。遂推定數月以後之同逃爲略誘。按之全案記錄。尙乏適當之證明。自非發回更求確證。以資認定。不足以昭折服。且上訴人迭次詞狀。均稱黃慧如願嫁爲妻。黃慧如亦承認曾給戒指。並在偵查中述稱我預備跟他的。原判事實。且經叙明黃慧如聲言願嫁爲妻。如果基於結婚之目的。則拐取之手段。縱施詐術。而其母若兄告訴之效力。亦應受刑法第三百二十二條第二項之限制。就黃慧如到案以後所有供述。對於上訴人多方迴護之情形觀之。其於黃朱氏母子之告訴。是否違反其意思。亦堪審究。更審之時。

亦應注意及之。至於幫助竊盜部分。據黃朱氏供稱。陸根榮於六月十二日走出。我檢點東西。知道首飾匣不見。詰問慧如。他說是陸根榮拿出去的。黃慧如在第一審供稱。東西是十二下半年帶出來的。陸根榮是十二日這天出來各等語。參以上訴人在偵查中承認帶出來三隻箱。他（指黃慧如）二隻我一隻各情。其犯罪嫌疑固所難免。唯刑法第四十四條第一項。係以與正犯有共同之認識。而幫助實施為要件。若於正犯之犯罪無合同之意思。或於正犯犯罪已經完成。而僅止事後加功者。即不能謂有共犯之關係。上訴人在偵查中。供稱首飾是小姐於十三日自己帶出來的。其在兩審所供無異。黃慧如亦謂東西是十三日我帶出去的。（見偵查筆錄）並謂陸根榮是十二這天出來。拿了他自己幾件衣服。一隻皮夾走的。東西都是我十三早上走的時候。自己帶走。沒有叫他帶的。（見一審筆錄）原審一再究詰。矢口不移。且稱箱子等件。東西是我十三日坐汽車拿去的。他（指上訴人）只知道是穿的平常衣服。亦不知道有首飾等語。其於黃慧如竊盜行為完成

以前。有無犯意之聯絡。事實上尙無確切之證明。黃朱氏既於其女出走之前一日。詢知首飾盒爲上訴人拿去。何以不卽追究。次晨其女開門出走之時。既又急忙追趕不及。又何以爲知空手而行。按之情理。殊不近情。原審據以認定上訴人卽於十二日幫同攜出。已嫌率斷。且於上訴人曾否明知箱內所存者爲黃慧如行竊之物。抑如黃慧如所述。只知道是穿的平常衣服。復未詳予推求明確。本院自無從遽爲法律上之判斷。上訴意旨及辯護意旨。指摘原判認證之不當。自非全無理由。據上論結。應依刑事訴訟法第四百零九條第一項第四百十三條判決如主文。